



JORNAL

do

Parlamento Nacional

VI LEGISLATURA

2.ª SESSÃO LEGISLATIVA (2023-2028)

REUNIÃO PLENÁRIA DE 17 DE FEVEREIRO DE 2025

Presidente: Ex.^{ma} Sr.^a Maria Fernanda Lay

Vice-Presidentes: Ex.^{ma} Maria Terezinha da Silva Viegas
Ex.^{mo} Sr. Alexandrino Afonso Nunes

Secretária: Ex.^{ma} Sr.^a

Vice-Secretárias: Ex.^{ma} Sr.^a Maria Teresa da Silva Gusmão

SUMÁRIO

Sr.^a Presidente Maria Fernanda Lay, hafoin verifica quórum, declara aberta sessão plenária iha tuku 9 liu minuto 24 no halo kedas leitura ba agenda serbisu loron ne'e nian.

Antes Ordem do Dia – Sr.^a Secretária da Mesa halo leitura ba carta justificação de faltas

husi Sr.^a Deputada sira Maria Rosa da Câmara «Bisoi», Cristina Yuri R. dos Santos Costa no Ângela Maria Corvelo de A. Sarmento.

Tuirmai mak declaração política Bancada FRETILIN nian ne'ebé ko'alia kona-ba evicção, ne'ebé, tuir bancada ne'e nia haree, la justo no discriminativo.

Iha intervenções diversas, Sr. Deputado sira foti assunto sira hanesan: falta residência ba estudante universitário sira; serbisu SEATOU nian; risco choque elétrico ba labarik sira-ne'ebé fa'an besik semáforo Delta nian; tinta *Zebra Cross* nian; discriminação durante evicção; pensão ba funcionário sira-ne'ebé atu tama ona ba idade reforma; empregabilidade ba foin-sa'e hirak ne'ebé tuir ona formação profissional iha centro formação SEFOPE nian; comportamento condenável membro PCIC ida nian iha bairro Delta IV; ponto entrada Napan iha Oesilo, Oe-Cusse; condição estrada ba Suco Usekai no Suco Mape no ba suco balu iha zona Liquidoe no Remexio nian; acidente rodoviário ne'ebé acontece ba ambulância ida iha Zumalai; ahi han uma-lisan Waibado; placa inauguração ponte Noefefan nian; transportação paciente ida iha Suco Sibuni; falta equipamento ba técnico EDTL nian sira; pagamento salário ba guarda florestal; aplicação Lei do Ordenamento do Território liga ho despejo administrativo; veículo sira-ne'ebé halai ho velocidade aas; chinês sira-ne'ebé hala'o atividade negócio retalho tama to'o mercado tradicional sira; livre circulação animal nian iha área Hera; falta eletricidade iha aldeia balu iha Município Lautém; Falta sala aula nian no condição escola balu nian ne'ebé aat; gestão ligado ho merenda escolar; falta parteira iha posto saúde balu iha Município Viqueque; Desempenho equipa futebol seleção nacional nian; validação dados combatente libertação nacional iha Município Liquiçá; Estatuto *East Timor Coffee Institute* nian; avaria iha linha elétrica iha município Ermera no município balu tan; falta professor ba disciplina ciência exata nian iha EBC Lospalos; desproporcionalidade entre serviço prestado no salário iha EDTL; condição estrada iha Soro Kraik; critério foun liga ba atribuição Bolsa da Mãe; cobrança husi funcionário público iha Same liga ho visita Primeiro-Ministro nian; caso suborno ne'ebé

envolve Diretor SERVE nian; engarrafamento iha semáforo iha área Balide nian; desempenho INDDICA nian; orçamento alocado ba SEATOU; desenvolvimento empresarial no empresário *broker* sira;

Liutiha ida-ne'e, Sr. Vice-Ministro dos Assuntos Parlamentares responde ba questão hirak ne'ebé Sr. Deputado sira foti.

Ordem do Dia – 1. Assentimento à deslocação do Presidente da República Socialista do Vietname, em Visita de Estado; 2 Aprovação de voto de pesar pelo falecimento de Harold Maria Meneses Moucho. .

Senhor Deputado no Senhora Deputada sira-ne'ebé halo intervenção iha sessão ne'e mak: José da Cruz (FRETILIN), José Virgílio R. Ferreira (CNRT), António Verdial de Sousa (KHUNTO), Gabriel Soares (CNRT), Florentino Ximenes da Costa «Sinarai»(FRETILIN), Natalino dos Santos Nascimento (CNRT), Antoninho Bianco (FRETILIN), Maria Rosa da Câmara «Bisoi» (CNRT), Armando dos Santos Lopes (PD), Mariquita Soares (FRETILIN), Anacleto Freitas no Leandro Lobato (CNRT), Luís Roberto da Silva (KHUNTO), Antoninho Doutel Sarmiento (FRETILIN), Cedelízia Faria dos Santos (CNRT), Óscar Lima (FRETILIN), Carminda Carlota (CNRT), António Moniz Calau (FRETILIN), Saul Salvador H. J. Amaral no Maria Gorumali Barreto (CNRT).

Sr.^a Presidente encerra reunião plenária ne'e iha tuku 12 liu minuto 46.

Sr.^a **Presidente** (Maria Fernanda Lay): — Distintos Deputados, são 09h24, ho respeito ha'u convida hotu-hotu bele hola fatin para ita bele verifica quórum e hahú ita-nia sessão plenária.

Horas hatudu tuku 09 liu minuto 24.

A Sr.^a Vice-Secretária Teresa ha'u bele convida mai leten tanba Deputada Virgínia ho Deputada Bendita la bele tama, ne'ebe Sr.^a Vice-Secretária, halo favor mai hola fatin iha leten.

Srs. Deputados, infelizmente ita la iha quórum, nem quórum funcionamento, ne'ebe dala ida tan, ba bancada do Governo ha'u agradece tebes, ita iha preocupação. Se iha quórum funcionamento, ita hahú ita-nia atividade, bainhira to'o iha debate mak ita hein quórum deliberativo.

Halo favor.

Bem, distintos Deputados, ita iha quórum de funcionamento, ita-nia agenda ba ohin loron nian, dia 17 de fevereiro 2025, iha «... Período Antes de Ordem do Dia:

1). Justificação de faltas dos distintos Deputados;

2). Informação sobre relatório de visita de Sua Excelência o Presidente da República aos Emirados Árabes Unidos entre os dias 2 e 5 de fevereiro...» – mas ne'e, ha'u hanoin, cancelado –

«...3). A distribuição e apreciação do relatório de fiscalização nas instituições tuteladas pela Comissão de Educação, Cultura e Cidadania (Comissão G);

4). A distribuição e apreciação do relatório das Audiências Públicas da Comissão de Educação e Juventude;

5). Declaração política das bancadas parlamentares da FRETILIN e do PLP...», mas também Deputados não estão aqui, não sei se eu terei que esperar;

«... 6). Intervenções diversas dos Srs. Deputados;

7). Intervenção do Sr. Vice-Ministro dos Assuntos Parlamentares...»

Iha «... Período da Ordem do Dia...» temos um «...assentimento à deslocação de visita oficial do Sr. Presidente a Vietname, e aprovação do voto de pesar pelo falecimento do Sr. Harold Maria Meneses Moucho».

Ne'ebe, ha'u fó kedas ba Sr.^a Secretária atubele lê justificação de faltas.

Halo favor.

Sr.^a **Secretária da Mesa** (Maria Teresa da Silva Gusmão): — Obrigada, Sr.^a Presidente.

Bom dia ba Sr.^a Presidente, Vices, colegas Deputados, Sr. Vice-Ministro dos Assuntos Parlamentares.

«Requerimento de justificação de falta

Ex.^{ma} Sr.^a Presidente do Parlamento Nacional,

Maria Rosa da Câmara «Bisoi», Deputada ao Parlamento Nacional, pertencente à Bancada do CNRT, vem requerer a Vossa Excelência que se digne considerar justificadas as faltas dadas à reunião do Plenário no dia de 10 de janeiro 2025 por motivo de saúde.

Data, 12 de fevereiro de 2025

A Deputada

Maria Rosa da Câmara “Bisoi”».

«Ex.^{ma} Sr.^a Presidente do Parlamento Nacional,

Cristina Yuri Rebelo dos Santos Costa, Deputada ao Parlamento Nacional, pertencente à Bancada da FRETILIN, vem requerer a Vossa Excelência que se digne considerar justificadas as faltas dadas à reunião do Plenária nos dias 27, 28 de janeiro 3, 10 e 11 de fevereiro de 2025 por motivo de razões ponderosas.

Data, 13 de fevereiro de 2025

A Deputada

Cristina Yuri Rebelo dos Santos Costa».

«Ex.^{ma} Sr.^a Presidente do Parlamento Nacional,

Ângela Maria Corvelo de A. Sarmento, Deputada ao Parlamento Nacional, pertencente à Bancada do CNRT, vem requerer a Vossa Excelência que se digne considerar justificadas as faltas dadas à reunião do Plenário nos dias 10 e 11 de fevereiro de 2025 por motivo de razões ponderosas.

Data, 14 de fevereiro de 2025

A Deputada,

Ângela Maria Corvelo de A. Sarmento».

Obrigada Presidente.

Sr.^a **Presidente:** — Tuirmai, ita tama kedas ba declaração política das bancadas parlamentares. Ha'u hahú husi Bancada da FRETILIN.

Sr. **José da Cruz** (FRETILIN): — Obrigado, Sr.^a Presidente.

Ha'u-nia bom dia ba Ita-Boot, composição da Mesa, Sr. Vice-Ministro, ilustre Deputada e Deputado sira hotu, povo Maubere no Buibere.

«Declaração Bancada FRETILIN sobre evicção ne'ebé la justo no discriminativo.

Constituição da República reconhece direito fundamental cidadão sira-nian, liuliu direito ba propriedade privada, direito ba uma no direito ba ambiente.

Direito fundamental sira-ne'e foin bele hetan bainhira Governo cria ona política pública ba ordenamento território no planeamento urbano ida-ne'ebé sustentável no inclusivo ba povo Timor-Leste tomak.

Haktuir Lei n.º 6/2017, Bases do Ordenamento do Território, ne'ebé exige Governo hodi halo esforço tomak atu alcança desenvolvimento ida-ne'ebé sustentável no progressivo ba povo Timor-Leste, hodi garante desenvolvimento economia, criação bem-estar cidadão sira-nian, proteção ambiente no recursos naturais, valorização património cultural, histórico no religioso, Estado no povo iha responsabilidade atu contribui ba construção cidade ne'ebé organizado, sustentável no inclusiva ho base husi princípio lulik libertação povo nian, ne'ebé ema rihun ba rihun defende ho sira-ne'e sacrifício tomak durante luta contra ocupação regime ditadura Indonésia nian iha ita-nia Rain.

Bancada FRETILIN hakarak continua fó-hanoin ba Governo ida-ne'e atu labele marginaliza povo Maubere husi benefício desenvolvimento Nação ne'e nian, hodi fó de'it espaço no tratamento especial ba hirak ne'ebé iha capital boot, rico no sira ne'ebé iha poder político hodi mesak goza Timor-Leste nia ukun rasik an.

Desde início, Bancada FRETILIN nota katak Secretário de Estado dos Assuntos da Toponímia e da Organização Urbana hala'o nia atividade evicção la tuir princípio sira ne'ebé estipula iha Constituição no lei sira ne'ebé estabelece. Povo ki'ik sira fácil hetan evicção, hetan duni no bandu atu buka moris no hela iha fatin potência economia nian, enquanto sira ne'ebé rico no iha osan continua hela no goza ho hakmatek.

SEATOU usa força polícia no militar sira hodi obriga povo ki'ik sira sai husi sira-nia hela-fatin, sem iha plano reintegração economia no social, inclui indemnização ne'ebé la justo ba vítima despejo administrativo sira durante ne'e.

Buat sira-ne'e acontece tanba la iha plano fixo kona-ba instrumento no orientação husi planeamento ordenamento território iha nível nacional, muito menos planeamento território iha nível município sira.

IX Governo hakarak halo luan estrada hodi halo cidade ne'e sai furak, maibé la iha plano atu hafurak povo nia moris, ne'ebé direito ne'e consagra na iha Constituição RDTL iha artigo 58.º hodi

hatete, atu iha uma ida ho nia dimensão no condição di'ak, moos no conforto atu ema bele iha intimidade no privacidade familiar nian.

Daudaun ne'e Governo hahú identifica ona plano evicção ba nia povo sira, la'ós iha Díli de'it, maibé começa ona iha município sira.

Bancada FRETILIN continua husu ba Governo atu halo plano ordenamento ida-ne'ebé integrado, sustentável no inclusivo no tem que envolve povo ho máximo.

Povo tem que iha liberdade atu ko'alia sira-nia hanoin kona-ba plano Governo nian ne'ebé sei afeta sira-nia moris; povo tem que hetan informação suficiente ne'ebé natoon atubele muda hela-fatin no buka moris hodi sustenta sira-nia oan sira-nia educação; sira tem que hetan solução ne'ebé di'ak no justo husi Governo ba sira-nia fatin foun ne'ebé livre husi ameaças husi autoridade Governo nian, biar sira hela iha rai Estado ka propriedade privado ema seluk nian ka sira hela iha sira-nia uma rasik ne'ebé sira harii ho sira-nia kosar-been.

Excelência Presidente Parlamento, distinto membro Parlamento no Vice-Ministro, caso seluk ne'ebé ami hakarak hato'o iha Uma Magna ida-ne'e mak plano alargamento estrada Becora, ne'ebé iha desenho plano alargamento estrada ne'e mós desvia ka sees husi membro Governo balu nia família sira-nia uma. Prática ida-ne'e hatudu momoos katak povo ki'ik sira-nia rai, uma no moris la importante ba ukun IX Governo ida-ne'e nia matan compara ho ema rico sira. Será que Rai ida-ne'e ba elite sira de'it? Ka Rai ida-ne'e mós ba povo ki'ik sira?

Excelência sira, Bancada FRETILIN hakarak declara, iha Uma Magna ida-ne'e, katak importante tebes atu iha planeamento no ordenamento território ida-ne'ebé sustentável, integrado no inclusivo atu evita despejo forçado sira ne'ebé viola princípio fundamental sira ne'ebé consagra iha Constituição, especificamente iha artigo 44.º n.º 1 «Ema ida-idak iha direito atu movimenta no estabelece hela-fatin iha-ne'ebé de'it iha territorial nacional», no artigo 54.º n.º 3 kona-ba «requisição no expropriação ba utilidade pública só acontece iha indemnização ne'ebé justo».

Tuir *UN-Habitat*, despejo forçado bele fó impacto sério ba indivíduo ka comunidade sira, inclui hamosu falta de abrigo, lakon acesso ba necessidade básica sira, hanesan cuidado saúde no educação, aumenta pobreza, trauma psicológica, perturbação social no diminuição iha qualidade moris, ne'ebé dala barak afeta desproporcionalidade ba grupo marginalizado sira iha sociedade nia leet, essencialmente viola direitos humanos no habitação adequada.

Povo iha direito atu hela iha fatin e hela metin iha uma sira ne'ebé sira harii, tanba ne'e, bainhira hasai família ida husi sira-ne'e hela-fatin, Governo tem que cria condição mínima ida hodi sai hanesan uma temporário no cria programa habitação atu sira bele integra iha laran, nune'e Governo nia programa ordenamento território ne'e bele diminui risco hasoru ninia povo sira.

Ita hotu sei lembra liafuan husi atual Primeiro-Ministro, José Alexandre Xanana Gusmão, iha ninia acto impedimento despejo administrativo husi tribunal ba família uma-kain hitu iha Becora, hodi hatete, «Hasai ema sira-ne'e atu bá tau iha-ne'ebé?».

Bancada FRETILIN defende tratamento hanesan ba cidadão hotu-hotu. Maski nune'e, ami mós exige katak iha caso balu sira tem que hetan tratamento diferente. Ami cita frase husi sociológico português Boaventura Sousa Santos, «Ita iha direito atu sai hanesan bainhira ita-nia diferença halo ita sai inferior, no ita iha direito atu sai diferente bainhira ita-nia igualdade halo ita diferente...», tanba ne'e mak precisa igualdade ida-ne'ebé reconhece diferença sira-ne'e, diferença sira-ne'ebé la produz, la fó han ka la reproduz desigualdade sira».

Excelência sira, Bancada FRETILIN, dala ida tan, hakarak Estado ida-ne'e tem que luta maka'as atu hatuur sociedade ida-ne'ebé baseia ba valores justiça social, progresso no desenvolvimento participativo no sustentável, tanba ne'e ami condena maka'as ação despejo forçado ne'e, liuliu kona-ba tratamento ne'ebé desigual ba cidadão sira-ne'ebé sofre husi atuação SEATOU nian.

Loron hirak ikus ne'e ita haree notícias, declaração população afetada sira, ne'ebé maior parte ho rendimento ki'ik, katak to'o ohin loron sira seidauk hetan compensação husi Estado hanesan promete ona, e realidade comprova facto ne'ebé hatete, defende husi *UN-Habitat*, katak iha processo evicção, ema sira-ne'ebé hetan prejuízo no sofre maka'as liu mak ema sira-ne'ebé ho rendimento ne'ebé ki'ik.

Bancada FRETILIN lamenta ho SEATOU ne'ebé duni ona ema, maibé até agora seidauk selu indemnização, lá hatene cria condição necessária ba realojamento ka reintegração ba vítima sira, liuliu labarik ki'ikoan no inan isin-rua sira. Ami haree katak bainhira SEATOU la cria condição sira hanesan ami temi iha leten, maka ita sei husik povo barak mak sai vítima iha atuação evicção sira iha futuro.

Iha Lei n.º 8/2016, Expropriação por utilidade pública, artigo 21.º, kona-ba estudo de impacto social e plano de realojamento, husu atu Governo, antes implementa nia plano evicção, tem que halo estudo kona-ba impacto social, ne'ebé nia objetivo mak atu identifica consequência positiva no negativa sira ba ema interessada nia moris, ne'ebé hamosu tanba expropriação.

Plano realojamento nu'udar plano ação ida-ne'ebé estabelece procedimento hodi hakmaan efeito contrário no fó compensação ba buat hirak ne'ebé ema interessado lakon tanba expropriação.

Excelência sira, iha fatin ida-ne'e, ami hakarak hatudu iha-ne'e história sucesso rua bainhira buat hotu funciona ho planeamento integrado no coordenado. Hanesan referência ne'ebé SEATOU bele usa atu dignifica ita-nia povo Maubere mak SEATOU bele foti Cidade Helsinki ho Cidade Medellín atubele sai referência hodi halo evicção iha território Timor laran.

Ikusliu, Bancada FRETILIN exige atu SEATOU opta ba meio comunicação persuasivo, nune'e bele hetan diálogo mútuo entendimento atu nune'e evicção la'o ho dame sem sofrimento, nune'e processo reintegração iha povo nia moris la hetan mudança radical no processo desenvolvimento sei acontece tuir dalan ne'ebé justo no equilibrado ho modo sustentável no resiliente.

Mak ne'e de'it, obrigado barak».

Sr.^a **Presidente**: — Tuirmai, ha'u convida kedas Bancada do PLP.

Halo favor.

Sr. **Maria Angelina Lopes Sarmiento** (PLP): — Obrigada, Sr.^a Presidente.

Devido a um lapso técnico ne'ebé iha, ami husu atu adia fali ami-nia intervenção ba aban, ohin ami seidauk bele halo.

Obrigada.

Sr.^a **Presidente**: — Aban la iha Plenário tanba ha'u la iha matéria, iha líder decide tiha ona, para fó tempo ba comissões hodi hala'o audiências liga ho lei.

Ha'u husu cópia da declaração política tanba a partir de agora ou a partir do momento que ita aprova ita-nia *site*, buat hotu ita tau iha-ne'ebá, tanba Bancada FRETILIN kleur la fó cópias para tau iha-ne'ebá, tanba ne'e é do conhecimento. Dehan «sei hadi'a», ne'ebé ha'u dehan, por favor o que foi lido é isso que devia mandar publicar.

Ne'ebe, dala ida tan, ha'u agradece, tama mai ho cancelamento ida-ne'e, ha'u taka ona registo, já temos aqui dez Deputados, tanba ita iha aprovação rua tuirmai.

Ha'u fó kedas ba Sr. Deputado António Verdial.

Não está, ha'u hakat ba Sr. Deputado José Virgílio.

Sr. **José Virgílio R. Ferreira** (CNRT): — Di'ak, obrigado ba tempo.

Bom dia ba ita hotu.

Ha'u-nia respeito ba Sr.^a Presidente ho componente da Mesa, ba Sr. Ministro dos Assuntos Parlamentares, ba Deputado no Deputada sira no mós povo rona-na'in sira.

Iha-ne'e ha'u hakarak louva no fó parabéns dala ida tan ba coordenador Município Baucau nian, Deputado Virgílio Pereira, ne'ebé halo atividade Partido CNRT nian hodi hametin confiança estrutura iha base ba oinmai.

Tuirmai, ha'u hakarak foti mós kona-ba assunto povo nian, liuliu kona-ba ita-nia jovem sira. Ba Ministério do Ensino Superior, aban bainrua tem que iha ona plano hodi haree oinsá iha

universidade sira, ita-nia jovem sira-ne'ebé oras ne'e daudauk balu mós halerik hela kona-ba sira-nia hela-fatin.

Por exemplo, iha Hera, ha'u mós bá haree horisehik, jovem sira-ne'ebé hela *kost* ne'e sira aluga ho barato, maibé iha fatin ida de'it ema bele na'in-hitu ou na'in-ualu mak toba iha *kost* laran, ne'ebe husu ba Ministério do Ensino Superior hodi haree assunto sira-ne'e, plano iha orçamento ba aban-bainrua ou tinan oin mai bele halo *asrama* ida ba ita-nia jovem sira iha universidade. Ita atu eleva hodi hasa'e ensino, liuliu ba ita-nia jovem sira, ita tem que toma nota hodi nune'e jovem sira bele hetan fatin digno, liuliu ba estudante sira.

Tuirmai, ha'u mós hakarak husu ba Comissão G, bele tuun direita, bá halo fiscalização karik, labele bá de'it universidade ou ministério, se bele tun ba fatin sira-ne'ebé estudante sira hela bá ne'e, iha universidade ne'ebé de'it no iha fatin ne'ebé de'it, hanesan iha Hera, iha UNTL iha-ne'ebá iha mós jovem sira hela ba.

Tuirmai, ha'u louva nafatin ba IX Governo ne'ebé mai ho nia programa rasik ho orçamento ba tinan lima. Ita compara ho tinan lima kotuk liubá, estrada metro ida de'it mós ita la haree, ne'ebe fiar katak tinan ida ho balun ne'e Governo ida-ne'e halo duni atividade lubuk ida tuir nia programa no orçamento.

Kona-ba evicção, ne'ebé Governo halo liuhosi SEATOU, ha'u louva tebes ba SEATOU tanba população iha Timor laran começa compreende ona saida mak Governo halo. Atu halo desenvolvimento, Governo bá mós la'ós SEATOU tuun ba de'it atu lori força hodi hasai, maibé ita haree katak iha tinan 2023 kotukbá ne'e socialização informação ne'e fó ona ba população sira. E parabéns ba IX Governo, liuhosi SEATOU, iha linha ministério ne'ebé iha coordenação di'ak hodi halo evicção ne'e, haree iha aspeto barak, iha social e saúde mós ita haree katak buat ne'e la'o hela, Governo ida-ne'e ita haree katak buat hotu di'ak.

Tuirmai, ha'u mós hakarak hato'o tan, ita haree iha *lampu merah* ne'ebé foin daudauk sira halo, husu ba Ministro bele encaminha ba ministério relevante tanba *lampu merah* sira-ne'e sira *cor*, se bele taka aviso iha-ne'ebá para ema labele besik, tanba iha Delta nian ne'e *lampu merah perempatan* Timor Plaza nia oin, ita haree ita-nia oan, ita-nia alin sira fa'an manu-tolun ne'e, sira rabat ba iha-ne'ebá no risco ne'e bele iha corrente elétrica, e ta'uk ida-ne'e, ne'ebe fó hatene ba ministério relevante hodi haree assunto ida-ne'e.

Kona-ba estrada, ita haree iha *zebra cross* sira-ne'e agora precisa pinta foun filafali atu nune'e ita-nia comunidade no ita-nia povo sira la'o hodi concentra haree ba *zebra cros*, selae orsida sira buka fali dalan atu hakat ba estrada sorin, haree ba *zebra cross* la iha, iha-ne'ebá carreta movimenta ba mai, então ida-ne'e risco ba ita-nia comunidade sira.

Mak ne'e de'it, Sr.^a Presidente.

Obrigado.

Sr.^a **Presidente**: — Tuirmai, ha'u fó tempo ba Sr. Deputado António Verdial de Sousa.

Sr. **António Verdial de Sousa** (KHUNTO): — Muito obrigado, Sr.^a Presidente.

Bom dia, Sr.^a Presidente e componente da Mesa, Vice-Ministro ne'ebé trata assunto parlamentar, distintos Deputadas no Deputados, maluk rona-na'in tomak ne'ebé sintoniza hela atan ha'u lian husi Uma Democracia ida-ne'e, ha'u-nia saudações fraternais.

Ba dahuluk, Bancada KHUNTO nafatin secunda ninia declaração política ne'ebé baibain Bancada Kmanek Haburas Unidade Nacional Timoroan levanta iha Uma Democracia ida-ne'e kona-ba situação quotidiana ita-nia povo tomak ne'ebé enfrenta iha Rai ida-ne'e, especialmente iha Díli, Baucau no fatin seluk ne'ebé tuirmai ita hotu sei haree no acompanha.

Declaração política ne'ebé Bancada KHUNTO halo ho objetivo fundamental atu hafanun no fó-hanoin ba IX Governo Constitucional ka órgão executivo atubele tau iha plano, la'ós ami atu buka popularidade iha Uma Democracia ida-ne'e. Dala ida tan, ne'e la iha dalan. Ami-nia objetivo fundamental husi ami-nia expressão política liuhosi declaração política nafatin ha'u atu hatete, katak hakarak hafanun Governo atu serbisu tuir loos de'it regras ne'ebé vigora. Nafatin ha'u husu atu tratamento saida de'it ligado especialmente ba evicção, ninia tratamento ne'e tem que dimensional, economia, social, política cultura, defesa no segurança sai base fundamental hodi bele trata assunto ne'e ho digno.

Na qualidade hanesan Deputado, ne'ebé representa povo liuhosi instrumento político KHUNTO, oinsá loos tratamento ba povo sira-ne'ebé hetan evicção iha Fomento ou mota-laran iha dia 2 de janeiro tinan 2025 liubá, Governo indemniza ka fó netik buat rahun ruma ba povo sira, nune'e atubele hatutan povo nia moris? Tanba agora daudaun, tuir observação ne'ebé atan ha'u acompanha no direta acompanha maluk hirak ne'ebé kona evicção, to'o ohin loron sira seidauk hetan buat ida husi Governo. Precisa ita tau iha fuan katak sira-ne'e povo ne'ebé kbiit-laek loos. Ha'u atu hatete katak ba hirak ne'ebé halo uma temporariamente hela iha monta laran, sira mai Díli ho objetivo atu buka serbisu hodi hetan netik osan, no osan ida-ne'e sira bele usa hodi hatutan sira-nia oan sira-nia escola.

Ha'u atu hatete de'it, na qualidade hanesan Deputado mós, tuir ha'u-nia observação iha terreno, ha'u haree, ita trata assunto ida-ne'e, liuliu ita halo discriminação ba hirak ne'ebé iha kbiit no hirak ne'ebé la iha kbiit. Ne'ebe, favor boot ida, ha'u atu hatete katak ita tem que trata assunto ne'e ho fuan no neon, nune'e halo povo ne'e bele sente haksolok, katak sira iha ukun-na'in duni atu haree ba sira-nia situação real no realidade sira rasik hasoru.

Ha'u haree buat hirak-ne'e hotu, ha'u acompanha iha televisão, iha-ne'ebá ita-nia Excelência Ministro das Obras Públicas declara katak restaurante Cosette, ne'ebé iha tasi-ibun ne'e dehan katak

seidauk book, tanba ema ne'e osan barak. Maibé, ha'u atu hatete katak labele halo hanesan ne'e! Tanba saida? Ita lori *loader*, *loader* tiha maluk sira-ne'ebé kbiit-laek, maibé ema ne'ebé rico-na'in hanesan iha restaurante ne'e ita la book. Tuir loloos ne'e book uluk nia mak mai ita book povo ki'ik sira-ne'e. Triste tebes ho política ida-ne'e. Maibé, atu hatete katak la loos Bancada KHUNTO la secunda ka la *mendukung*, lae! Bancada KHUNTO hakarak haree progresso desenvolvimento ne'ebé agora daudaun halo, maibé ha'u atu hatete katak ita tem que iha Lei do Ordenamento do Território, especialmente, tecnicamente serbisu ne'e tem que integrado no serbisu ne'e tem que halo liuhosi coordenação, cooperação, colaboração entre entidade governamental, halo tuir de'it lei haruka. Ida-ne'e mak ha'u-nia hakarak.

E ita mós haree, acompanha katak ita-nia Governo halo declaração política, liuliu entidade governamental, especialmente Ministério Público no SEATOU, loos, claro katak sira la autoriza atu ema ne'e halo uma iha foho-hun, halo uma iha foho-lolon. Favor boot ida, ita haree ba maluk hirak ne'ebé restaurante didi'ak sira iha tasi-ibun ne'ebá ne'e, iha 2009, wainhira ami halo sensibilização ba iha-ne'ebá, IV Governo Constitucional hasai tiha osan lubuk ida hodi halo relocação ba ema sira ne'e, maibé ha'u-nia pergunta: tanba saida mak ita la bele mantém sá mak Governo anterior halo? Ita fó oportunidade, biban atu nune'e sira bele desenvolve no halo tan uma barabarak ne'e. Tanba ne'e mak, wainhira ita atu halo evicção, favor boot ida, buat ida ne'ebé uluk Governo anterior halo ne'e, Governo atual tau matan bá, atu nune'e bele...

Sr.^a **Presidente**: — Muito obrigada.

Sr. **António Verdial de Sousa** (KHUNTO): — ... hadi'a sasán sira-ne'e tuir regras ne'ebé vigora.

Obrigado, Sr.^a Presidente.

Sr.^a **Presidente**: — Distintos Deputados, ha'u hanoin, ita bolu membro do Governo mai hatán ita iha-ne'e sobre evicção para evita às vezes bá ne'ebá, balu bá ne'ebá, não é? Iha regras para hala'o ne'e. Lei horibainhira be lori mai iha-ne'e ita discute, sobre legalidade urbanística também tá ali, aguarde! Tá bem? Iha regaras duni ne'ebé aprova iha 2022. Ne'ebe ha'u fó-hanoin de'it.

Tuirmai, Sr. Deputado Gabriel Soares.

Sr. **Gabriel Soares** (CNRT): — Obrigado, Presidente, bom dia.

Bom dia, Excelência Vice-Ministro, colegas distintos e distintas Deputados.

Sr.^a Presidente, ami hakarak halo continuação uitoan de'it ba ami-nia relatório e parecer, Comissão G, iha ponto 4 ne'e, ami atu fó hatene hela de'it ba Sr.^a Presidente, colega Deputado sira, katak iha relatório ne'e nia laran nia *isi* ne'e hakerek momoos kona-ba resultado fiscalização. Iha assunto ida que importante liu mak ami cita iha-ne'ebá, kona-ba reforma.

Ita hotu hatene katak Governo lori lei ne'e mai e Parlamento autoriza, e daudaun Governo haka'as an oinsá atu trata assunto ne'e.

E fiscalização ami tuun ba kraik, ita-nia maluk funcionários ne'ebé idade ita haree ba sira atu besibesik ona ou balu ultrapassa tiha ona, sira sempre, ami halo audiência ho sira, pergunta mai la seluk la leet, mak: «pelo menos aban bainrua ami descansa, ami-nia vida resto ne'e, ami-nia direito ne'e oinsá?». Ida-ne'e mak iha relatório e parecer, quase iha 13 municípios, ami foti referência lubuk ida, então Comissão mai elabora nia relatório, tau iha relatório e parecer e ami entrega ba Mesa Parlamento. E, ita iha hanoin katak Parlamento tem que halo duni discussão, bolu entidade ne'ebé relevante e Governo para mai halo transmissão ida explica kona-ba, liuliu ita hatene katak sira idade to'o ona reforma maibé sira hatete katak «pelo menos, ami reforma tiha, ami-nia direito por mês oan ne'e halo nu'usá?». Ida-ne'e mak ami atu fundamenta tan ami-nia relatório e parecer ne'e.

Segundo, atu fó-hatene mós ba Excelência Vice-Ministro, em relação ho atividade formação ba jovem sira. Ha'u haree katak la'o capaz tebetebes entre serviço em geral, formação husi Ministério da Juventude, Desporto, Arte e Cultura tanba iha município sira iha hotu centro juventude ba lian inglês, Coreia ho habilidade sira seluk. E, para além de ne'e, husi SEFOPE (Secretaria de Estado da Formação Profissional e Emprego) mós instala tiha ona e instala tan daudaun kona-ba sira-nia *office* iha cada município. E assunto ba formação, se bele karik, entre instituição rua ne'e halo coordenação ba malu oinsá atu identifica ita-nia jovem potencial ne'ebé aproveita liuhosi formação lian Coreia, lian inglês e habilidade carpintaria, pedreiro iha-ne'ebá ne'e ita identifica para oinsá centro juventude produz e husi parte SEFOPE nian bele utiliza ita-nia jovem potencial ne'ebé mai ho sira-nia habilidade ida-idak.

E, ikusliu, ha'u atu haree assunto uitoan de'it kona-ba declaração Bancada FRETILIN nian, ko'alia kona-ba assunto evicção.

Ba ha'u-nia lian, ha'u hatete hanesan ne'e: ita halo declaração ne'e direito, direito tomak ba ita, maluk sira, sistema democracia mak ne'e. Maibé, ha'u lakohi ita usa sistema ida – ita halo declaração ne'ebé liga ho evicção, ha'u husu para, se bele karik, ita mós tem que kaer ita-nia kanoruk – ita-nia liman lolo tiha mas ita-nia kanoruk ne'e ita la consegue kaer, tanba evicção ne'e la'ós foin acontece iha IX Governo, lae! Excelência Vice-Ministro, uluk kedas iha rai ki'ik ka rai boot iha-ne'ebá ne'e, ita haree povo halai runguranga iha-ne'ebá, será que iha momento ne'e iha kedas ona plano, indemniza kedas ona, osan tau kedas ona? Ita hotu mesak Timor nia oan, maibé ita fó-hanoin para atu hadi'a.

Por exemplo, uluk iha Oe-Cusse, iha fatin naran sá mak ne'e ka, Fulolo ka, ema runguranga iha-ne'ebá. Será que iha momento ne'e iha ona plano? Se ami hatete katak ita halo evicção ne'ebá ne'e plano la iha, maibé ami mós sei la hatete ida-ne'e, tanba ita-nia Rain, rai Timor, ita precisa atu hadi'a husi tempo ba tempo.

Ne'ebe, evicção ida-ne'e ho evicção ida uluk iha-ne'ebá ne'e atu hatete de'it katak ida-ne'e, ha'u sente, sei iha dalan liu. Referência ida be kona-ba evicção ne'e mak ida iha Fulolo ne'e, plano iha kedas ona ka? Se plano iha kedas ona, nu'usá mak uluk povo halai bá halai mai, exige bá exige mai, conferência de imprensa bá-mai? Maibé, ne'e ladún. Maibé, atu fó-hanoin malu tanba Timor ne'e, Timor nia oan sira hotu husi geração sira mai to'o ita, ita mak tem que fó-hanoin oinsá atu hadi'a.

Ha'u sente, hanesan ne'e, Presidente.

Obrigado.

Sr.^a **Presidente**: — Tuirmai, ha'u fó tempo ba Sr. Deputado Florentino Ximenes.

Sr. **Florentino Ximenes da Costa «Sinarai»**(FRETILIN): — Excelência Presidente Parlamento Nacional, distintos Deputados, mídia nacional, povo doben Timor-Leste, camarada Buibere no Maubere sira hotu.

Secunda tebes declaração Bancada FRETILIN nian tanba declaração hirak ne'e pertinente duni, evicção sira ne'ebé desumano duni, saúde aat ba beibeik, educação hakiduk ba beibeik. Maibé, ha'u fiar katak situação hirak ne'e talvez labele hamosu beibeik alergia husi colega distinto Deputado sira, liuliu Deputado bancada Governo sira, husu para labele alergia, tanba realidade mak ida-ne'e duni.

Iha dadeer kmanek ida-ne'e ha'u mós atu bolu hela atenção ba Polícia Nacional Timor-Leste, hodi see tilun hela ba problema ida ne'ebé acontece iha Bairro Delta IV, Aldeia São José, Suco Comoro, katak membro PCIC ida ho naran Francisco Moniz Gonçalves sempre halo terror ba população iha bairro Delta IV ho arma ne'ebé nia lori. Sr. Francisco Moniz Gonçalves, ex-membro Polícia Nacional Timor-Leste, ne'ebé ema hotu hatene katak PNTL hasai tiha ona nia husi membro efetivo polícia nian, maibé Sr. ida-ne'e halo ema hotu iha Aldeia São José hakfodak tanba nia sai fali membro PCIC (Polícia Científica e de Investigação Criminal) nian. PCIC rasik la halo análise didi'ak molok recruta Sr. Francisco ne'e nu'udar membro PCIC nian, tanba Sr. ida-ne'e iha hela moras *kejiwaan* ka moras mental. Mesmo Sr. ne'e rasik hela iha Bairro Delta IV, nia sempre halo terror ba jovem no população iha bairro refere. Ho razão ida-ne'e mak husu ba PCIC atu haree didi'ak fali personalidade Sr. Francisco nian no atu halo investigação mós ba caso tiro kilat iha área Delta IV no ameaça jovem sira iha área refere.

Sr. Vice-Ministro dos Assuntos Parlamentares, iha dadeer ida-ne'e ha'u mós continua fó-hanoin ba ita katak iha zona fronteira Napan nian – Napan ne'e hola parte iha Município Kefamenanu, *TTU (Timor Tengah Utara)* ita hotu hatene katak Kefamenanu ne'e hanesan município ida husi Província *NTT (Nusa Tenggara Timur)*, Indonésia ninian, ne'ebé fronteira ho ita-nian Município Ambeno iha parte Oessilo ninian – iha fronteira Naan parte Indonésia nian hadi'a ona no eis Presidente Jokowi, molok termina ninia mandato, mai to'o iha Napan hodi inaugura sira-nia instituição iha sira-nia sede imigração, ka indonésia nia lian dehan *PLBN (Pos Lintas Batas Negara)* ka Posto Integrado Oessilo ninian, enquanto husi parte Timor-Leste, Governo seidauk halo buat ruma iha fatin ida ne'ebá. Ho factos hatudu katak ita-nia fronteira taka iha parte Oessilo nian, tanba ne'e husu Governo atu loke hikas filafali ita-nia fatin ida ne'ebá, tanba ita hotu hatene, quase loroloron população sira tama-sai ba Indonésia no mós fila mai Oe-Cusse. Tanba ne'e ita hotu tem que haree para loke fali fatin hirak ne'e para evita ema tama-sai ilegal iha área ida-ne'e porque população hela barak tebes iha-ne'e.

Ha'u filafali mai Capital Díli, Sr. Vice-Ministro, ha'u hatete beibeik ona katak iha *perempatan* Elemloi sempre *macet*, engarrafamento loroloron, meio-dia, kalan, loraik, mas, Sr. Vice-Ministro, to'o agora la tau atenção atu tau *lampu merah* iha-ne'ebá para evita engarrafamento ne'e, Vice-Ministro.

Obrigado barak.

Sr.^a **Presidente**: — De seguida, ha'u fó tempo ba Sr. Deputado Natalino dos Santos.

Sr. **Natalino dos Santos Nascimento** (CNRT): — Sim, obrigado.

Bom dia, Sr.^a Presidente, Mesa, Sr. Vice-Ministro dos Assuntos Parlamentares e colega distinto Deputado sira.

Ha'u, ohin dadeer ne'e, atu foti questão estrada, liuliu iha Covalima, atu bolu atenção ba Governo atu tau atenção ba Suco Usekai, suco ida, fatin ida que importante tebetebes. Iha tempo da resistência hanesan bolsa ba guerrilheiro sira, maun boot sira ne'ebé halo guerrilha iha ai-laran sira hatene katak fatin ida-ne'e importante tebetebes, comandante Deker mós tuur iha-ne'e, fatin ida que importante tebetebes. Fatin ida-ne'e to'o agora isolado tebetebes, precisa atu hadi'a estrada.

No mós Suco Mape, é preciso hadi'a estrada para nune'e população sira ne'ebá bele iha acesso mai iha município no mós acesso ba posto administrativo hodi lori sira-nia produto local mai fa'an.

E nune'e mós iha parte Aileu nian, ha'u hakarak foti questão ida kona-ba estrada mós, liga ba estrada Liquidoe no Posto Remexio. Suco haat ne'ebé iha-ne'ebá, Suco Maumeta, Suco Fahisoi, Suco Fadabloko, suco sira ne'ebá ne'e fatin ida importante tebetebes tanba iha-ne'ebá iha produto barak hanesan sabraka, café, ananás, iha tempo população sira lori mai Díli, coitado, estrada ladún di'ak, tanba ne'e ha'u husu Governo atu tau atenção ba estrada sira-ne'e.

Nune'e mós, ha'u hakarak ko'alia iha-ne'e, ohin colega sira-nia declaração balu cita artigo Constituição furafurak maibé interpretação ne'e tuir ita-nia gosto, ita-nia hakarak de'it. Maibé, ha'u hakarak dehan, katak evicção importante tebetebes, ita hakarak ka lakohi, Governo halo. Tanbasá? Ha'u louva SEATOU (Secretário de Estado dos Assuntos da Toponímia e da Organização Urbana), nia brani duni implementa lei ne'ebé iha. Ita iha tiha plano urbanização, ita iha tiha Lei do Ordenamento do Território, ita hakarak ordena Estado ida-ne'e ka Governo ida-ne'e agora ita mai dehan buat hotu la di'ak, ha'u hakarak hatete tan, colega sira, se agora la começa ordena, organiza, bainhira tan? Tanba ne'e ha'u husu, colega sira, se Ita-Boot sira usa hanesan instrumento ida atu segunda terça ko'alia iha-ne'e, Ita-Boot sira interessado, bele submete Ita-Boot sira-nia requerimento ba Mesa hodi bolu ministro sira mai atubele responde ba Ita-Boot sira, selae Ita-Boot sira-nia lian ne'e lian laek de'it liuhosi rádio para população sira haree. Ha'u haree katak tinan ida-ne'e Ita-Boot sira haree dehan la di'ak, maibé ha'u aprecia nafatin população sira, liuliu começa husi Kuluhun sa'e to'o Becora, povo ida-idak começa sobu daudauk. Ne'e hatudu katak povo sira consciente, sira mós hakarak duni Estado ida-ne'e, liuliu Capital Díli, ordenado duni. Tanba ne'e ha'u husu colega sira, dala ida tan, colega sira ne'ebé segunda terça foti kona-ba SEATOU, Ita-Boot sira, se interessado, hatama Ita-Boot sira-nia requerimento, regimento fó dalan mai iha-ne'e ita debate.

Tanba ne'e ha'u, dala ida tan, aprecia Governo, IX Governo Constitucional, liuliu SEATOU, nia serbisu ne'e di'ak. Ita bele haree iha mota-ninin ne'ebá começa di'ak daudaun ona, população sira husi tasi-ibun começa sobu daudaun, ita haree capaz tebetebes. Maibé, ita mai questiona nafatin sasán sira-ne'e, ha'u-nia observação e ba conclusão ikus katak colega sira usa de'it Plenária para hakarak segunda terça atu lori matéria SEATOU de'it, nu'usá la halo requerimento para mai ita debate, para nia mai explica «Baseia ba saida. Ita-Boot sira ilegal, evicção ilegal». Nia sei mai ko'alia kona-ba enquadramento legal ne'ebé fó competência ba sira atu halo. E tanba ne'e, colega sira, ha'u dala ida *pesimis* tebes e lamenta tebetebes ho declaração ida-ne'e.

Uluk iha educação, segunda terça, ita consegue resolve tiha ona, iha saúde pára tiha ona, agora começa ita bá foco fali ba ida SEATOU nian ne'e, ne'ebe, ha'u lamenta, lamenta tebetebes! E husu colega sira, liuliu bancada oposição, Ita-Boot sira bele hatama requerimento e bolu ministro sira mai, liuliu SEATOU, mai iha-ne'e para depois ita debate, atu justifica, clarifica Ita-Boot sira-nia argumento sira Ita-Boot sira foti ne'e e iha-ne'ebá bele fó resposta, bele satisfaz ita para ita haree matéria seluk, ita preocupa ho matéria seluk, liuliu ba desenvolvimento ida-ne'e. Aprecia Ita-Boot sira-nia crítica, mas crítica Ita-Boot sira-nian, ha'u haree, la'ós crítica construtiva.

Ida-ne'e de'it mak ha'u hakarak foti iha-ne'e.

Obrigado ba Sr.^a Presidente.

Sr.^a **Presidente**: — De seguida, o Sr. Deputado Antoninho Bianco.

Sr. **Antoninho Bianco** (FRETILIN): — Obrigado.

Bom dia e agradece ha'u sei moris hodi ko'alia lia-loos.

Respeito ba Presidente ho representante Governo, colega sira hotu.

Primeiro de tudo, ha'u secunda mais de 100%, orsida cinco minutos ha'u sei tuir, sei ko'alia buat ne'e, maibé iha-ne'e ha'u sei hato'o lai aspiração povo husi Zumalai, katak desastre ida acontece tanba motorista ne'ebé kaer ambulância ne'e ho condição lanu. Pronto, ha'u hanoin, Governo tem que buka to'ok solução. Se carreta bakufila significa buat balu que iha-ne'ebá precisa atende.

Tuirmai, iha Venilale desastre natural, udan no anin sobu uma-lisan Waibado, Ita-Boot sira bele haree to'ok bá, sé mak iha cultura, haree, tau matan! Uma-lisan ne'e sobu, pronto, la aproveita.

Tuirmai, kona-ba ZEESM (Zona Especial de Economia Social de Mercado) nia placa Ponte Noefefan ne'ebé desde junho de 2017 ita halo inauguração, placa ne'e sobu tiha, kala tau fali ema seluk nia naran karik. Tanbasá? Tem que justifica!

Tuirmai, ba Bobonaro, diretor saúde ba ambulância ne'e la autoriza ambulância atu bá tula ema moras, maibé realidade ema sei hulan fali ema moras ne'e. Ne'e acontece iha Suco Sibuni.

Tuirmai, EDTL, iha território tomak, ha'u hanoin, ita labele duun maibé ita hatene katak buat ne'e acontece. Equipamento segurança ba ema sira-ne'ebé atu tau matan kona-ba transmissão sira-ne'e tem que tau, keta halo aprovisionamento ne'e mak dificulta, ne'ebe acontece. Ha'u temi de'it Venilale, maibé mós iha Díli, quase território tomak. Ne'ebe Governo lalika hakilar de'it dehan buat hotu la'o di'ak, hanesan ohin maluk sira hatete ne'e, mas buat barak mak la'o la di'ak. Ha'u contacta loroloron e agora de'it informação ha'u tem que hato'o.

Tuirmai, kona-ba guarda florestal. Território tomak ema halo serbisu tempo ida-ne'e, maibé fulan liubá, la hatene, tanbasá mak ema sira la hetan osan. Será que contrato imi hapara tiha hakarak tau fali ema foun, ha'u hanoin, hirak ne'e ita tem que tau matan. Ne'e buat balu de'it.

Maluk sira, buat hotu dehan la'o di'ak ne'e, ha'u sente, só milagre karik. Ita tem que hatete buat ne'ebé loos ne'e loos, buat ne'ebé la loos ne'e la loos.

Declaração bancada ne'e hafanun Ita-Boot sira. Lei do Ordenamento do Território ne'e lei geral, Ita-Boot sira la cumpre. Iha lei nia princípio, execução ne'e tem que cumpre regra técnica sira. Orsida mak ha'u sei ko'alia. Será que plano de ordenamento municipal existe ona? Será que plano urbano iha tiha ona? Será que iha uso de território ne'e espaço ne'e iha ona? Karik buat sira-ne'e la iha, ita lalika ko'alia buat ne'e! Lei do Ordenamento do Território ne'e buat ampla ida. Mesmo que nune'e, Lei do Ordenamento do Território ne'e qualquer ação Governo tem que respeita direito propriedade perfeito ou direito uso hodi nune'e ema labele sai vítima.

Conceito errado, aplicação ne'e errada. Ita-Boot sira, Deputado ho membro Governo, entende ou la entende Lei do Ordenamento do Território nia espírito, oinsá tan ema povo simples. Liuliu, Deputado sira iha-ne'e, ko'alia dehan buat hotu di'ak, Ita-Boot sira la entende saida mak princípio fundamental Lei do Ordenamento do Território hatete. Ne'e de'it la iha. Saida mak Lei do Ordenamento orienta ba Governo tem que halo, ne'e de'it la halo. Agora Ita-Boot sira dehan «buat hotu la'o di'ak, tuir regras», la iha! La iha conceito desenvolvimento ida que halo ema sai vítima, ne'e nunca! Karik bele halo ema sai vítima, ne'e conceito errado. Qualquer desenvolvimento tem que baseia ba plano. Plano ne'e tem que husi saida? Ne'e estudo ida kle'an. Ne'e relação ho saida? Relação ho necessidade ema moris, la'ós relação ho empresário sira. Espaço ó bele usa, mas para que serve este espaço? Utilização espaço é importante. Utilização espaço ne'e atu iha karik ne'e dehan ó sobu ida-ne'e ó atu halo saida iha parte ne'e? Agora ha'u husu: Ministro, tuir Ita-Boot nia plano urbano karik, iha Díli ne'e...

Sr.^a **Presidente**: — Muito obrigada.

Sr. **Antoninho Bianco** (FRETILIN): — ... pronto, orsida mak ha'u sei ko'alia iha tempo cinco minutos ne'e.

Sr.^a **Presidente**: — Distintos Deputados, estamos a misturar alhos com bugalhos. Compensação la hanesan expropriação. Expropriação mak fó ba terreno privado, compensação terreno do Estado ema usa mak ita fó *ganti rugi* ba sasán iha leten, ne'ebe ita kahur. La'ós ha'u mak ko'alia ohin ne'e, la'ós ha'u la compreende, mas ita hotu, *kayaknya*, kahur. Ne'ebe, dalan ida tan, fila hikas ba lei ne'ebé ita aprova ho decreto-lei ne'ebé Governo aprova, ne'e para não misturar alhos com bugalhos.

Tuirmai, ha'u fó kedas ba Sr.^a Deputada Maria Rosa de Câmara «Bisoi».

Sr.^a **Maria Rosa da Câmara «Bisoi»** (CNRT): — Obrigada ba tempo.

Bom dia ba Presidente, ba colegas Deputados no participante sira hotu.

Iha-ne'e ha'u sei ko'alia ponto rua ka tolu.

Primeiro, atu ko'alia kona-ba motor ho carreta agora daudauk halai ne'e la sukat – Vice-Ministro, desculpa – la sukat ona kona-ba halai, velocidade maka'as liu, sikat leet leet iha carreta nia klaran ka motor, la controla. Oinsá ministério tutela ne'e bele controla ka fó aviso ida atu labele hanesan ne'e tanba desastre barak iha tempo udan. Questão ida-ne'e buka hanesan ne'ebé atubele reduz uitoan ninia velocidade.

Segundo, atu ko'alia kona-ba china sira fa'an sasán ne'e. Agora daudauk sira usa carreta mak bá fa'an fali iha mercado. Iha ita-nia povo ki'ik sira ne'ebé fa'an *obralan* nia oin ne'e, sira lori roupa ba iha-ne'ebá fa'an tahan ida USD 1, foun, então ema hotu halai ba sosa ida-ne'e, sira ne'ebé tuur ho *obralan* ki'ikoan sira-ne'e ema la sosa ona, la folin ona. Haree to'ok questão ida-ne'e! Sira labele bá fa'an fali ho carreta, pára iha *obralan* nia oin para ita-nia povo ne'e bele moris mós! Questão ida-ne'e ita-nia população ka ita-nia vendedor sira lamenta maka'as. Iha Taibesi agora daudauk ne'e china maka lori carreta bá pára tama tiha ona iha mercado laran, fa'an roupa iha-ne'ebá, ne'ebe haree to'ok kona-ba questão ne'e.

Ponto ida fali mak kona-ba animal. Animal ne'e hahú kedas iha Fatuahi tuun tesik ba ne'e karau ho bibi agora daudauk ne'e iha *aspal* leten, na'in iha ka lae? Se na'in la iha, buka to'ok oinsá bele oho ka halo nu'usá, foti to'ok medida ruma haree kona-ba questão ne'e tanba animal karau ne'e agora daudauk iha de'it ona *aspal* leten. Ida-ne'e halo desastre beibeik ona, Metinaro tesik ba. Bibi mós hanesan, dadeer ita halai tesik ba maka'as loos ona, iha fatin-fatin. Agora, ita la bele controla, ne'e tanba saida? Buka to'ok dalan ida-ne'e atubele resolve questão sira hanesan ne'e. Ita bele halo buat hotu-hotu maibé animal nia fatin ne'e tem que iha para ema bele la'o. *Aspal* ne'e ba ema, la'ós ba animal.

Ikusliu, hakarak atu ko'alia kona-ba declaração política Bancada FRETILIN nian.

Semana-semana ka loroloron ita rona mós ita baruk tiha ona tanba povo nonook hela. Povo nonook hela hela, sobu mesak ona ninia uma sai ba nonook. Sira dehan: «kaleen tahan ida ami aproveita do que evicção mai máquina maka hanehan». Desenvolvimento ne'e tem que halo duni hanesan ne'e iha cidade Díli to'o iha município duni.

Ha'u rona dehan município mós tama hotu Díli ne'e mak desenvolvimento município ne'e la bele ka? Be sira-nia osan ida be ita vota boboot iha-ne'e tau ba, alocação ba município ne'e sira usa ba desenvolvimento ka lae? Ne'ebe ida-ne'e sira-nia serbisu. Ita hakarak ko'alia katak Governo ida-ne'e nunca husik liu ema ida terus mesak.

2006 ne'e aat liu, sunu povo nia uma, até ha'u mós ha'u-nia uma hetan sunu, sasán oan ida foin mak mai husi ai-laran fa'an sunu motuk hotu mós Governo mai reembolsa ka mai fó filafali compensação di'ak hela ne'e. Ne'ebe povo nonook, husik sira serbisu iha-ne'ebá bá, bolu mai sira justifica iha-ne'e dehan katak buat hotu ne'ebé la di'ak mak ita dehan katak la di'ak, mas di'ak ita dehan la di'ak hotu kedas ona ne'e, ne'e ita tuur de'it hanesan ne'e. Geração la'ós to'o de'it ita iha-ne'e, ita-nia oan sira-ne'e sei la'o ba oin ne'e.

Satán ita ko'alia katak ita tem que tama iha ASEAN. Ita tama iha ASEAN povo ki'ik mak la bá iha rai-li'ur *memang* nia la hatene duni, com certeza que la hatene duni-saida mak desenvolvimento nação seluk nian. Be ita sira-ne'e tesik bá haree ema nia la runguranga hanesan ne'e to'ok ida, fa'an sasán ki'ikoan-ki'ikoan. A não ser fatin isolado sira ne'ebé ita kala halo to'o iha-ne'ebá iha estudo

comparativo, mas fatin sira ne'ebé cidade boboot ita ba ne'e hanesan ne'e ka? Ita tinan 20 ne'e nafatin hela hanesan ne'e ka? Ne'ebe, di'ak liu mak husik Governo serbisu bá e rona mós baruk, di'ak liu sees tiha de'it lalika rona tan fali buat ida hanesan ne'e.

Obrigada.

Sr.^a **Presidente**: — Tuirmai, ha'u fó tempo ba Sr. Deputado Armando dos Santos.

Sr. **Armando dos Santos Lopes** (PD): — Di'ak, obrigada ba tempo.

Ba Presidente do Parlamento Nacional no composição da Mesa, Sua Ex.^a Vice-Ministro dos Assuntos Parlamentares, ba colega distinto Deputado sira hotu, média no povo rona-na'in tomak.

Em primeiro lugar, ha'u hakarak secunda intervenção husi Deputado Agio sobre *asrama* ba estudante sira iha Hera, e melhor *asrama* ba estudante sira hotu iha Timor laran tanba *asrama* ne'e faz parte atu eleva qualidade educação e ita bele controla estudante sira, *fokus* atu sira bele continua sira-nia estudo ho confortável.

Segundo, ha'u atu continua secunda intervenção husi Deputado Gabriel, ne'ebé ohin tau questão kona-ba recomendação husi juventude sira iha município hotu ba SEPFOPE no mós ba Ministério da Juventude, Desporto, Arte e Cultura atubele muda estratégia política ida para formação ne'e *fokus* liu ba iha municípios, ho razão, ida-ne'e ita bele fó apoio ba política centralização ne'ebé atu muda fali ba descentralização ba iha município sira hotu.

Além de ida-ne'e, ha'u mós hakarak aproveita hato'o ba Sua Excelência katak iha Município Lautém, iha aldeia ida-ne'ebé bolu dehan Kekerara – ne'e entre aldeia Buihomau ho Aldeia Daudere ho distância por volta de 300 m – ha'u hakarak hato'o tanba durante governação kleur ona aldeia ne'e to'o agora seidauk hetan ahi eletricidade. Tanba ne'e mak de repente ha'u to'o iha-ne'ebá, nakukun, ha'u husu ba sira: «Tansá mak imi-nia eletricidade ne'e nakukun hela?» Sira apresenta katak «Governo troca malu ami aproveita hato'o, mas Governo sira hatete katak ita cor la hanesan». Tanba ne'e mak ha'u husu ba Governo agora daudauk ne'e labele iha mentalidade ida hanesan ne'e, tanba democracia, ita idaidak atu fó ita-nia direito, maibé buat ne'ebé ita atu hato'o ba povo, ne'e direito ba povo hotu-hotu.

Muito obrigado, Presidente.

Sr.^a **Presidente**: — Tuirmai, Sr.^a Deputada Mariquita Soares.

Sr.^a **Mariquita Soares** (FRETILIN): — Bom dia ba Sr.^a Presidente Parlamento Nacional ho composição da Mesa, Vice-Ministro dos Assuntos Parlamentares, colega Deputado no Deputada sira, povo do ben rona-na'in iha Timor Lorosa'e.

Primeiro, ha'u hakarak sekunda declaração política Bancada FRETILIN nian.

Loos duni, evicção ne'ebé IX Governo Constitucional halo daudaun ne'e la'ós de'it afeta física maibé mós psicologia, ne'e tanba povo ida-ne'e la sente seguro no la bele halo knaar no serbisu normal no laho liberdade. Governo Dasiak, ne'ebé lidera husi Sr. Xanana Gusmão, orienta ninia ministro sira hodi sobu população sira-nia uma sem iha plano ne'ebé di'ak hodi povo ida-ne'e bá fatin ne'ebé digno.

Uluk Sr. Primeiro-Ministro Xanana Gusmão iha Bekusi hatete katak «quando imi sobu tiha povo ida-ne'e nia uma, nia atu bá loos ne'ebé? Povo mak Estado». Maibé, ohin povo ida-ne'e fó fiar tiha ba IX Governo, filafali sobu comunidade nia uma, atu dehan tan saida? Atu dehan tan ba povo ida-ne'e, «Ita-Boot sira la iha direito atu hela rai ida-ne'e?».

Consequência todan husi evicção ida-ne'e mak iha semana rua ba kotuk katuas ida ho condição la iha força, toba hela iha Ponte CPLP nia okos loron lima ona, la han, la hemu, tan la iha fatin ba nia atu descansa hafoin hetan evicção iha Fomento II. Ida-ne'e mak IX Governo Constitucional dehan mai ami, «la'ós atu ukun, maibé atu serbí?» Então serbí loos mak sé se povo ida-ne'e duni lakon hotu? No serbí mak duni povo sira sai husi sira-nia hela-fatin? Povo evacuado la hetan segurança no la hetan tratamento ho digno hanesan ema.

Ha'u hakarak hateten mós katak iha mídia social no iha terreno ita observa katak estudante sira tuur de'it iha rai mak tuir processo aprendizagem, sira la iha sala de aula, processo aprendizagem continua la'o ho condição ne'ebé aat. Programa mesak furak de'it iha surat-tahan leten hodi halo contente ita-nia an, maibé povo ida-ne'e nafatin sai vítima.

Iha Programa IX Governo nian cada tinan sei constrói sala de aula hamutuk 1000 iha território laran tomak, maibé, factos hatudu, até escola balu mós sei tama iha lista evicção nian. La iha programa ruma bele fó esperança, maibé situação atual hatudu de'it incerteza no insegurança ba povo, liuliu ita-nia oan sira ne'ebé estudante ka iha escola. Ida-ne'e mak ohin ita-nia Deputado sira balu hatete katak educação ne'e resolvida ona? Karik lae.

Ha'u atu hateten tan de'it katak Escola Básica Central (EBC) ida iha Suco Madebou ne'ebé atu monu ona – informação ne'e hato'o ona ba Ministério da Educação – maibé to'o agora la fó importância. Se Ministério da Educação la halo ato ne'ebé lailais mak sei fó perigo balu ba alunos no professores nia vida, tanba la iha ona fatin seluk atu aluno sira bá tuir aulas, a não ser fatin ne'e duni. Ne'ebe, em vez de Ministério da Educação hale'u município hodi halo festa natal, nu'usá la tau osan sira-ne'e hodi hadi'a escola sira ne'ebé monu ona ne'e no escola sira ne'ebé iha ameaça ba alunos no professor sira-nia vida. Tanba ne'e mak husu ba Ministério da Educação atu tau atenção ba ida-ne'e.

Iha fatin seluk ita haree katak merenda escolar ne'ebé ita haree situação continua sai problema tan fornece nafatin hahán dodok no la iha controlo máximo ba atividade ida-ne'e. Wainhira professor escola sira halo controlo hahán, husi gestão programa hatete katak professor escola nian la iha direito atu controla menu merenda escolar. Além de ida-ne'e, iha pré-escolar balu até à data seidauk simu merenda escolar. Tanba sá? Será que PAM (Presidente da Autoridade do Município) sira la iha tempo? Ou sei hanoin ka buka hela maluk companhia ruma atu kaer merenda escolar ne'e?

Sr. Vice-Ministro, tama ona ba tinan rua, maibé IX Governo ida-ne'e seidauk bele hadi'a situação ka condição escola, liuliu salas de aula, mesa, cadeira, menos professores no seluseluk tan. La kleur tan professor sira reforma, no ida-ne'e sei contribui nafatin bá menos professor iha escola sira. Maibé, ha'u la haree política di'ak no oinsá atu resolve falta professor sira. Maski Ministério da Educação contente ona ho bolsa de candidato, maibé, iha escola seluk ne'ebé sei nafatin mamuk no bolsa de candidato ida-ne'e nafatin refere ba escola ne'ebé hanesan. Iha fase primeiro no segundo simu tiha ona bolsa de candidato maibé iha escola ne'ebé nafatin hanesan no escola seluk nafatin mamuk, tanba ida-ne'e mak ha'u husu ba Ministério da Educação atubele tau atenção ba sasán sira hanesan ne'e.

Obrigado wa'in.

Sr.^a **Presidente**: — Tuirmai, ha'u fó tempo ba Sr. Deputado Anacleto Freitas.

Sr. **Anacleto Freitas** (CNRT): — Obrigado ba tempo.

Ha'u-nia respeito bá Presidente Parlamento Nacional, composição da Mesa, Vice-Ministro dos Assuntos Parlamentares, colega Deputada Deputado sira hotu, mídia, assessor sira, técnico sira e povo tomak, bom dia ba ita hotu.

Iha dadeer-saan ida-ne'e ha'u hakarak foti assunto rua ka tolu iha Município Viqueque kona-ba saúde nian.

Primeiro, ha'u atu ko'alia, iha clínica ne'ebé dook husi município ba posto iha Viqueque, hanesan Uaimoritula no Matebian huun ne'ebá, Luaraikua. Clínica sira-ne'e iha pessoal saúde iha-ne'ebá, só que parteira mak la iha, tanba ne'e, ita-nia inan-feton sira ne'ebé atu parto ruma karik sempre halai mai iha centro município ka posto. Dook tebes, às vezes ambulância mós la iha, buat sira-ne'e hotu, ne'ebé ita-nia ema sira-ne'e exige, karik bele, iha clínica sira-ne'e ita bele completa mós parteira iha-ne'ebá para depois bele atende ita-nia inan-feton sira. Ida-ne'e mak sira hato'o hela para depois ha'u bele hato'o iha-ne'e.

Ida fali mak ha'u hakarak ko'alia kona-ba ita-nia jogador sira-ne'ebé representa Timor ba rai-li'ur, karik bele, ita halo *seleksi* bá, husi município sira-ne'ebé iha ne'e ita *seleksi* sira-nia ema mak lori sai karik di'ak.

Foin daudaun iha jogo Xanana Cup ne'ebé acontece ne'e, ema maihusi aldeia no suco sira mak manán fali jogadores nacional nian, ita-nia jogador sira-ne'e lakon hotu fali ho sira. Foin daudaun Xanana Cup ne'e Baucau ho Viqueque mak tama iha final, Laisorulai ho Warikoan. Ne'e sinal hatudu, jogador Díli ne'e hanoin la iha karik. Ne'ebe, karik bele, ita hakarak lori jogador sira-ne'e bá rai-li'ur, tem que liuhusi *seleksi* mak bele lori ba li'ur para bele hatudu qualidade ne'ebé di'ak, jogador ida-ne'ebé di'ak, para depois ita mós hatudu, Timor mós bele. Selae hili malu iha-ne'e de'it, hili família de'it, hili malu colega de'it, ita bá simu mak *sebelas kosong* ka *dua belas kosong*. Eipa! Ha'u-hanoin, ida-ne'e ladún di'ak. Foin daudaun ne'e joga clube husi Baucau ho Viqueque mak mai *juara* iha-ne'e, mas clube ne'e mós mai husi suco, la'ós representa município. *Kok* bele manán iha-ne'e fali? Ha'u hanoin, jogador Díli ne'ebé representa Timor ba rai-li'ur ne'e, ha'u la hatene, ita-nia *pelatih* sira-ne'e *seleksi* halo nu'usá mak ne'e la hatene. Ho ida-ne'e, ita-nia jovem sira recomenda hela mai ha'u para depois ha'u bele foti, atu nune'e Vice-Ministro, karik bele, encaminha hela ba ministério relevante para depois jogador sira-ne'e bele ita *seleksi* husi município hotu-hotu tau hamutuk mak representa Timor para bele bá joga iha rai-li'ur.

Ha'u hanoin, ida-ne'e mak ha'u foti iha dadeer-saan ida-ne'e.

Obrigado.

Sr.^a **Presidente**: — Tuirmai, Sr. Deputado Leandro Lobato.

Sr. **Leandro Lobato** (CNRT): — Bom dia, Presidente Parlamento Nacional, composição Mesa, caro colega Deputado sira hotu, Excelência Vice-Ministro dos Assuntos Parlamentares, povo doben Timor-Leste.

Presidente, ha'u aproveita oportunidade ida-ne'e atu hato'o hela informação ida-rua.

Primeiro, atu informa bá Vice-Ministro dos Assuntos Parlamentares oinsá mak bele comunica ho MACLN (Ministério para os Assuntos dos Combatentes da Libertação Nacional) liga ho dados veteranos nian ne'ebé taka iha município sira.

Agora, iha Município Liquiçá, validador sira-ne'ebé envolvido iha Comissão, depois de dados edital ne'e taka-sai tiha lista veterano sira-nian ne'e, equipa validador sira-ne'e mak halo fali contestação, sira mak aprova tiha, depois sira mak contesta. Agora ita hakarak husu, ne'e iha intenção saida iha-ne'ebá? Tanba grupo ka tanba cor partido? Que sira valida tiha, depois sira contesta. Tanba ne'e maka ha'u husu ba ministério ho Presidente do Conselho dos Combatentes da Libertação Nacional (CCLN) tem que ser mós husu tuir equipa validador sira-ne'e, tanba sira contesta iha-ne'ebá

cento e tal pessoas, ne'ebé naran sai iha *edital* enquanto sira mak valida, inclui sobrevivente 12 de Novembro na'in-12. Ida-ne'e sai problema.

Agora, sobrevivente sira-ne'e realmente la passa informação iha município, sira mai iha Comité 12. Lamentação husi sobrevivente sira katak sobrevivente nia maluk mak contesta ne'e iha razão. Agora husi parte equipa validador mak contesta fali, tanba ne'e mak aproveita oportunidade ida-ne'e atu husu ba MACLN, tem que ser haree equipa sira husi município, selae sira tau sira-nia interesse maka'as liu hodi invalida ema nia dados.

Segundo, aproveita mós oportunidade ida-ne'e atu husu ba Governo, *ETCI (East Timor Coffee Institute)* Gleno, Ermera nian, submete ona sira-nia pedido atu transforma universidade privada ba universidade pública. Karik Governo, liu-husi Ensino Superior, bele considera atu nune'e aceita ho sira-nia pedido ida-ne'e.

Terceiro, Presidente, iha Ermera, ha'u simu telefone, ahi mate desde horikalan to'o fali horas ne'e. E, la'ós foin acontece, ne'e beibeik ona, inclui mós município sira seluk, tan ne'e mak ita husu ba Governo oinsá atu halo gestão ba ahi tanba ahi mate beibeik mós prejudica ita-nia população sira-nia atividade sira no estraga mós sasán eletrónico sira-ne'e. Povo lamenta kona-ba ahi mate no mate hela de'it.

Ikusliu, nafatin recomenda ba Governo atu haree didi'ak lista veteranos. Ita hakarak contesta, ita tem que ser apresenta dados, katak nia la merece ba tama iha categoria 8 a 14 tanba hanesan ne'e hanesan ne'e. Mas, ida contesta ne'e mós tem que pronto para ema mós bele contesta hasoru nia tanba nia mós hetan prova prisão 8 a 14 no 15 a 19 ne'e mai husi ne'ebé. Nia pronto contesta e nia mós pronto atu ema seluk halo contestação hasoru nia.

Obrigado, Presidente.

Sr.^a **Presidente**: — Tuirmai, ha'u fó tempo ba Sr. Deputado Luís Roberto.

Sr. **Luís Roberto da Silva (KHUNTO)**: — Obrigado, Sr.^a Presidente.

Bom dia ba Ita-Boot, membro da Mesa tomak, Ex.^a Sr. Vice-Ministro dos Assuntos Parlamentares, colega Deputado ho Deputada sira, no povo doben Timor-Leste mak ha'u hadomi no tane nafatin.

Iha-ne'e ha'u atu hatu'o assunto rua, primeiro mak iha setor educação.

Iha semana kotukbá, bainhira ha'u dada lia ho maluk ida husi Município Lautém, iha escola Ensino Básico Central Lospalos nian, até à data professor sira-ne'ebé atu hanorin Matemática, Física no Biologia la iha, até à data. Depois, escola ida-ne'e halo encontro geral ho labarik sira-nia pai ho

mãe sira, depois haruka sira atu hatama osan 3 USD ema ida hodi buka professor contratado atu hanorin *bidang* Matemática ho Física.

Sira hato'o tiha ona ba Ministério da Educação maibé Ministério da Educação dehan katak halo recrutamento faseadamente. Pergunta ba Ministério da Educação mak ne'e: halo recrutamento faseadamente depois aprendizagem la'o nafatin até à data, *bidang* rua ne'ebé até à data professor seidauk iha ne'e la kleur tan estudante sira tama ona ba iha exame *Cawu I*, valor atu fó ba sira ne'e husi ne'ebé? Atu fó 10 ka 0 tau ba sira-nia *buku raport* laran ne'e? Ida-ne'e mak dehan katak sistema educação seidauk la'o di'ak. Ne'ebe, colega Deputado sira, labele ko'alia buat ne'ebé em geral, maibé iha kraik la halo análise iha implementação, quando prejudica labarik sira-nia aprendizagem.

Segundo, ha'u halai liu ba ECTL, E.P. (Eletricidade de Timor-Leste, Empresa Pública). ECTL, E.P., tuir ha'u-nia observação, agora iha-ne'ebá ne'e hamosu irregularidade barak tebetebes, mal gestão e mal administração mós iha ECTL, E.P. Baseia ba pagamento salário ne'ebé baseia ba Despacho n.º 105/2022 Ministério das Obras Públicas nian, haree, hamosu mal gestão iha-ne'ebá tanba agora daudaun ne'e sira halo redução ba ema nia grau ba funcionário técnico permanente sira-ne'ebé serbisu iha ECTL, E.P. ne'e, ne'ebé iha anterior ne'ebá sira tuir teste por mérito, depois, foin daudaun ne'e Presidente ECTL, baseia ba despacho ida-ne'e, halo redução ba ema nia grau hotu. Por exemplo, grau A hatún fali ba grau C. Ida-ne'e contra. Maski ida-ne'e hanesan autonomia *internal* ECTL, E.P., maibé, ita baseia filafali ba lei Função Pública nian, ida-ne'e contra.

Salário ne'ebé agora fó ba sira iha ECTL, E.P. ne'e ki'ik liu mak 377 USD ba *cleaner service*, boot liu compara ho administração pública, iha-ne'ebé funcionário público balu cento e tal de'it, maibé ECTL, E.P. ne'e fó salário ne'ebé boot tebetebes. Satán Presidente ECTL, ita bele dehan katak simu salário ne'e buat *dua kali lipat* husi Deputado e Ministro sira, inclui Presidente da República. Ida-ne'e mak ha'u bele dehan katak mal gestão, precisa ita-nia Governo tau matan ba ida-ne'e ho didi'ak, katak reforma administrativa precisa haree sasán sira hanesan ne'e, tanba base orçamento ida de'it. *Kecuali* ECTL, E.P. ne'e cada tinan labele aloca tan OGE ba, sira moris mesak, cria mesak, buka rasik osan, ne'e karik di'ak. Cada tinan fó nafatin osan ba liuhusi Ministro das Obras Públicas, tanba saida mak halo tuir sira-nia hakarak, hasai despacho ida ba ita-nia funcionário sira osan boot tebetebes e depois halo tuir sira-nia hakarak. Ne'ebe, irregularidade mosu iha-ne'ebá ita precisa haree. Haree de'it ba experiência serbisu mós balu moris iha 1994, 1995 ninia experiência serbisu ne'e to'o tiha tinan 15 no 16, então karik sei iha 10 anos ka 9 anos ne'e nia serbisu tiha ona, ne'ebé experiência ne'e fó kedas 10 anos, 16 anos e depois fó salário ne'ebé boot, 2 mil ba leten. Ida-ne'e mak ita precisa haree didi'ak.

Obrigado, Sr.^a Presidente.

Sr.^a **Presidente:** — Muito obrigado.

De seguida, Sr. Deputado Antoninho Doutel Sarmento.

Sr. Antoninho Doutel Sarmento (FRETILIN): — Obrigado ba tempo.

Ha'u-nia respeito ba Excelência Presidente Parlamento, presidência da Mesa, Vice-Ministro dos Assuntos Parlamentares, colega Deputada e Deputado sira, mídia e técnicos, povo Maubere no Buibere sira, saudações revolucionárias!...

Sr. Deputado sira husi Bancada FRETILIN: — Sempre revolucionárias!

Sr. Antoninho Doutel Sarmento (FRETILIN): — ...Iha momento dadeer-saan ksolok ida-ne'e, em primeiro lugar, ha'u atu hatete assunto balu husi base.

Sr. Vice-Ministro, iha sexta liubá, ha'u iha Soru Kraik, iha Soru tuun Soru Kraik ne'e dalan sira-ne'e aat loos. Soru Kraik ne'e mós fatin iha história ida importante tebetebes mas nia dalan ne'e risco. Dalan sira-ne'e mout tiha ona, mas to'o agora la iha ema ruma atu hadi'a, dalan sira-ne'e iha Aldeia Nunfu, liga tuun ba Soru Kraik Vila. Dalan iha Soru mós aat. Depois, pior, ita iha posto saúde ida iha Soru Kraik, ema usa Orçamento Estado halo lutu ho besi ida ki'ikoan loos, tidin hale'u posto saúde ne'e ho arame ida e odamatan mós la monta, depois bibi-teen barak loos iha posto saúde ne'e. Buka atu fó atenção ba situação sira-ne'e!

Segundo, iha Same ita la iha ai-moruk injeção sira. Foin samodok tata tiha inan-feton ida, hodi ba hospital, iha dia 8 de fevereiro tem que simu fali receita husi doutor mai sosa ai-moruk iha *apotik* mak lori bá sona ema sira hodi alivia moras ida-ne'e. Então, serviço saida mak ida-ne'e? Dehan ai-moruk sira-ne'e barak hela mas ai-moruk sira iha fatin sira ne'ebá la iha. Ne'e atu informa para depois considera, husu ministra nia atuação sira.

Tuifali, ba ministério assunto social nian. Ita-nia comunidade informa katak ita-nia chefe aldeia sira informa, iha Suco Letefoho, katak agora iha fali critério foun kona-ba Bolsa da Mãe. Se inan ne'e loke quiosque ki'ikoan ida, ne'e critério katak nia la bele hetan ona Bolsa da Mãe. Se labarik nia maun ida ba serbisu ona iha rai-li'ur, critério ida tan mak ne'e, ne'e trava ona Bolsa da Mãe. Ha'u hanoin, tem que haree ida-ne'e atu explica oinsá.

Tuifalimai, ha'u hakarak informa, iha dia 5 de fevereiro, iha reunião entre presidente autoridade ho nia corpo estrutura tomak iha Município Manufahi, sira halo reunião para forma comissão organizadora ida, no iha dia 6 comissão organizadora ne'e hasai carta cobrança ida. Ha'u bele lê osan ne'e iha-ne'e – reunião ne'e atu simu Primeiro-Ministro ho Vice-Ministro iha fulan-março atu ba visita – Diretor sira 100 USD, Chefe Departamento sira 50 USD, administrador posto

sira 50 USD, chefe secção sira 25 USD, funcionário no «non-chefe» sira 10 USD e funcionário casual sira 5 USD.

Buat ida que ita la imagina, mas acontece. Ita hanesan fali uluk malae sira ukun, administrador posto ida visita tem que lori manu isin, manu-tolun para autoridade ne'e han. Ne'ebe, ha'u hanoin, tanba ne'e carta, se dada filafali ona ka seidak dada tem que buka hatene ida-ne'e. Keta halo, Primeiro-Ministro atu visita ba fatin hotu-hotu, hotu-hotu tem que halo cobrança hanesan.

Tuirfalimai, foin daudaun *viral* iha mídia, ita-nia Diretor ho Vice-Diretor SERVE (Serviço de de Registo e Verificação Empresarial) discute malu to'o dehan malu asu, beik-teen, tan de'it halo cobrança 100 USD husi Ermera ho tua cerveja caixa ida, atu promove nia ba sai Diretor SERVE iha Ermera. Quando la acontece ona nia hakerek carta mai Vice-Diretor depois halo ida-ne'e.

Sr. Vice-Ministro, iha campanha, Partido CNRT dehan atu repõe ordem constitucional, no fim, bá ukun tiha Rai ida-ne'e, ba repõe filafali 100 USD ho cerveja caixa ida ba posição. Ida-ne'e saida mak ne'e? Se ita buka sasán sira-ne'e, dignidade Estado ne'e tem que hatuur. Ita bá discute malu, trata malu. Ne'e baseia ba carta ne'e, katak atu foti nia ba Diretor ida iha SERVE iha-ne'ebá mas tem que hatama 100 USD ho cerveja caixa ida para fó ba Diretor Fausto atu celebra ninia knaar foun ne'ebé nia simu. Ne'ebe, ami hanoin, ida-ne'e precisa atu hetan explicação no buka atu hadi'a sasán sira-ne'e, senão ita la repõe ordem constitucional, ita ba repõe filafali cerveja ho 100 USD iha instituição sira hanesan ne'e.

Obrigado.

Sr.^a **Presidente**: — Tuirmai, Sr.^a Deputada Cedelízia Faria dos Santos.

Sr.^a **Cedelízia Faria dos Santos** (CNRT): — Muito obrigada, Sr.^a Presidente.

Ha'u-nia bom dia no respeito ba Ita-Boot, Vice-PPN na'in-rua, Vice-Secretária, distinta no distinto Deputado sira, Vice-Ministro dos Assuntos Parlamentares, ita-nia técnico sira-ne'ebé acompanha ita, mídia no rona-na'in Rádio Parlamento Nacional, povo doben Timor-Leste.

Excelência Vice-Ministro, iha dadeer-saan ida-ne'e ha'u iha preocupação rua mak ha'u hakarak foti.

Primeiro mak iha relação ho engarrafamento ne'ebé acontece maka'as iha Díli laran. Ha'u-nia questão ne'e halai liu ba iha *lampu merah* Igreja Balide nian. Ita hatene katak Governo, daudaun ne'e, halo hela reabilitação ba sinal trânsito sira, semáforo sira-ne'e, maibé ami hatene katak ita mós iha polícia trânsito sira. Iha parte Balide ne'ebá iha igreja, iha escola igreja Balide nian, iha Escola Portuguesa, iha mós escola TK (*Taman Kanak-kanak*) ida uluk iha ex-PM nian, fatin escola barak demais mak iha parte ne'ebá. Agora, se ita-nia sinal transito sira-ne'e la funciona, ami husu ba Excelência Vice-Ministro, favor ida relata hela ba ita-nia Ministro do Interior e Comandante-Geral

PNTL atubele fahe ita-nia polícia trânsito sira-ne'e iha fatin sira-ne'e, atu nune'e bele evita engarrafamento ida-ne'ebé demasiado. E, liuliu mak ita dehan sei afeta ba ita-nia estudante oan sira-ne'e, ne'ebé inan-aman atu lori sira ba escola, iha tempo hanesan ne'e sira bele tarde tama escola tanba barak mós ki'ikoan. Ida-ne'e ami husu tau atenção hela.

Iha parte seluk ne'ebé iha hanesan mós ne'e, favor ida tau hela ita-nia polícia trânsito sira iha-ne'ebá. Ita-nia polícia trânsito sira mós barak loos. Será que sira serbisu de'it iha edifício? Então situação hanesan ne'e ami husu Ita-Boot tau hela atenção.

Segundo, Excelência, ha'u lê ona resposta ne'ebé INDDICA (Instituto Nacional para a Defesa dos Direitos da Criança) fó mai ita, Ita-Boot rasik mak encaminha mai. Ha'u continua preocupa ho ita-nia alin sira, ita-nia oan sira-ne'ebé sei fa'an nafatin sasán iha *Timor Plaza* nia oin no mós Meimart.

Agora, horibainhira Deputado sira, inclui ha'u, ami foti ona questão ida-ne'e e INDDICA fó ninia resposta mai iha-ne'e, ha'u haree la iha loos meio ida mak atubele resolve labarik sira fa'an sasán ne'e. Iha-ne'e explica liu kona-ba dados serviço infantil nian foti husi ILO, UNICEF, labarik sira-ne'ebé serviço iha agricultura. Ha'u hanoin, ne'e ita ko'alia kona-ba dados. Ita hakarak ne'e fó pára tiha labarik oan sira fa'an sasán iha estrada ne'e, Excelência Vice-Ministro. Hanesan inan ida, ha'u preocupa, tanba ita haree mós labarik feto sira. Agora mídia ne'e hasai buat runguranga demais, ita ta'uk mak ema boot sira bele usa labarik feto ki'ikoan sira-ne'e ba sira-nia interesse ne'ebé la favorável ba ita-nia oan sira-ne'e

Karik sira-nia inan-aman iha dificuldade economia, maibé ne'e la'ós dalan atu haruka sira bá fa'an. Governo tau INDDICA ne'e atu haree sasán sira-ne'e. Se mosu mai ho resposta, favor ida ami husu ba Excelência Vice-Ministro haree mós resposta sira-ne'e wainhira haruka mai. Se la responde ba Deputado sira-nia pergunta, haruka fó filafali bá hadi'a tiha lai mak mai fali. Selae ita fó resposta bá-mai, bá-mai mas não faz sentido.

Ikusliu, ha'u mós hakarak louva serbisu SEATOU nian. Ha'u acompanha iha entrevista ida, ita-nia distinto Deputado sira balu dehan, «Governo ne'e la tau fali osan ba indemnização». Ha'u husu ba distinto Deputado sira, favor ida haree filafali livro plano anual nian ne'e, ne'ebé ita aprova hamutuk, iha hela ne'e, maski balu vota contra tiha, iha programa ida 0260706, ida-ne'ebé ita aloca orçamento ne'e iha Ministério das Obras Públicas nia laran. Ita-Boot sira lê fali SEATOU nian, claro la iha-ne'ebá, tanba SEATOU nia serbisu ne'e para bá hasai de'it ema sira e depois nia halo carta ba Obras Públicas mak sei halo pagamento sira-ne'e hotu.

Iha programa ida ha'u hatete ne'e, dentro de 10 milhões ne'ebé tau iha-ne'ebá, iha 3 milhões específico liu hodi halo pagamento ba indemnização sira-ne'e, ne'ebé, Governo tau hela osan, la'ós dehan la tau osan. Ita bá halo fali antena, dehan fali «Oh Governo la tau osan», então durante halo hela indemnização usa sé nia osan, empréstimo ka ita-nia osan privada ka ita mak fó hela osan ba? Ne'ebe,

informação sira-ne'e sala. Ita iha direito no dever hatu'o informação ida-ne'ebé loloos ba ita-nia comunidade sira atu lori informação ida-ne'ebé loloos.

Ita ko'alia kona-ba lei, ita iha Lei n.º 6/2017, Bases do Ordenamento do Território, ita iha Resolução Governo n.º 15/2022, ita iha Decreto-Lei n.º 9/2022, ne'ebé foin daudaun ita mai halo alteração, Lei Medidas de Tutela da Legalidade Urbanística. Ita iha lei, iha buat hotu-hotu. Pergunta mak ne'e: ema ne'e brani ka lae bá implementa lei no ordem sira-ne'e? Ne'ebe, ita agradece ba ita-nia SEATOU Germano, ho ninia esforço maka'as, ho nia espírito ida-ne'ebé timoroan duni, nia hakarak hadi'a cidade ida-ne'e e ita tem que aprova.

Ikusliu, ha'u secunda ho distinta Deputada Bisoi nian, ema povo nonook hela ita mak mai *cacing kepanasan* loos iha-ne'e segunda terça, segunda terça. Orsida povo dehan, ita la tuun ba terreno ida, ita mai foti loos de'it mak SEATOU nia serbisu ne'e.

Pergunta ida tan mak ne'e: be Ita-Boot sira mós uluk ukun ne'e halo tiha ona buat ruma ka? Halo karik, fó mai para ami mós bele halo tuir! La halo tan buat ida, agora ita mai mak ita fó loos exemplo.

Muito obrigada, Presidente.

Sr.^a **Presidente**: — Tuirmai, Sr. Deputado Óscar Lima.

Sr. **Óscar Lima** (FRETILIN): — Obrigado, Sr.^a Presidente.

Excelência Sr.^a Presidente, componente da Mesa, ilustres Deputados, Vice-Ministro dos Assuntos Parlamentares, maluk rona-na'in sira.

Primeiro, ha'u iha ponto ida atu ko'alia, kona-ba empresários.

Excelências, iha Timor ita iha empresários iha classe tolu, ne'ebé loron hira ne'e ami na'in lubun ida ko'alia inclusivamente ho Presidente Câmara do Comércio e Indústria Timor-Leste, haree assunto ida-ne'e ho sério. Ne'e mak ami hakarak hatu'o iha-ne'e katak, hanesan representante povo, ita hotu-hotu hakarak e hanoin katak ita sei desenvolve setor privado nacional conforme declarações políticas ne'ebé ita-nia maluk maun boot sira sempre halo e hakarak atu desenvolve setor privado nacional.

Setor tolu ne'e, ita ko'alia loloos de'it, primeiro agora presentemente buat ne'ebé la'o e sira sei queixa ne'e mak setor ida primeiro ne'e, ida-ne'ebé ita ko'alia loloos quase que sira hetan oportunidade husi maluk governante sira, maibé sira la consegue serbisu e la aprende atu serbisu. Ida-ne'e mak horisehik hatete katak ida naran *broker*, *broker* ne'e. *Broker* ne'e, *okay*, ha'u hatete katak bele, mas, Sr. Vice-Ministro, favor ida preparativo saida mak Governo hakarak atu haree ba *broker* sira-ne'e? Sira atu sai empresários ka atu hetan mak carreta vidro metan tanba hetan oportunidade husi compadre ho comadre sira. Ida-ne'e mak primeiro buat ida que, ha'u hanoin, ita tem que haree ho

sério. Maibé, se sira hakarak sai empresário, ita iha ita-nia Ministro Coordenador dos Assuntos Económicos, atual Vice-Primeiro-Ministro Francisco Kalbuady Lay. Nia mai husi *background* iha husi empresário e nia mós hatene atu hanorin sira atu sai empresário. Ida-ne'e ha'u hanoin, mas tem que controla para hanesan ne'e sira bele sai duni empresário. Ida-ne'e mak ita hotu-hotu hakarak.

Segundo maka empresário balu que hakarak tebetebes sai empresário, ida-ne'e mak sira agora to'o agora shaka'as an tebetebes. Balu até bá buka osan iha rai-li'ur para mai serbisu e depois iha ona *modal* maibé la consegue hetan oportunidades. Ida-ne'e mak ita hanoin tem que haree e fó ajuda bá para sira-ne'e bele nafatin, porque sira halo ona sira-nia serbisu boot tebetebes. Sira selu osan ba taxa ba Estado, sira rasik buka sira-nia osan, balu até penhor sira-nia rai ho uma iha banco hodi bele hetan sira-nia capital. Ida-ne'e mak, tuir loloos, ita tem que fó ita-nia apoio, selae ita la consegue buat ne'ebé ita-nia maun boot sira hotu ne'ebé iha campanha hatete, «ita tem que capacita setor privado nacional». Maibé ida-ne'e ha'u la haree. Se ita la prepara ida-ne'e, de certeza absoluta, ita sei la bele consegue buat ida.

Balu fali, setor ida-ne'ebé boot, que ita hotu hatene ona katak iha Timor mós iha ona setor privado timoroan mós barak tebetebes mak iha ona capacidade, maibé ida-ne'e quase ita ladún haree filafali. Ita balu até protesta fali tanba saida ne'e. Mas, ba ha'u, tuir loloos ita tem que fó suporte maka'as nafatin ba setor privado nacional, ne'ebé iha ona capacidade, halo ona investimento, halo levantamento de dados, sé mak halo ona investimento, sé mak la halo investimento, para buka hodi bele fó ita-nia suporte. Se ita la halo ida-ne'e, ha'u hanoin, susar tebetebes ba ita atubele dudu ita-nia setor privado nacional ba ne'ebá.

Ita protesta ita-nia maluk sira-ne'ebé maihusi li'ur, ita protesta ita-nia maluk sira-ne'e dehan, «Husi Comoro sa'e to'o Becora ne'ebá ne'e ocupa ona husi ita-nia maluk ne'ebé mai husi li'ur», maibé, enquanto ita la prepara ita-nia an sira-ne'e, ita mós la consegue.

E depois, ida fali, ha'u hakarak husu ba membros do Governo, labele hein de'it Primeiro-Ministro de'it mak ninia hanoin di'ak e la corresponde husi ministro sira-ne'ebé iha departamentos. Departamentos haree, se bele, fó apoio ba ita-nia maluk setor privado nacional, para ita bele dudu, selae ita hela ho fama ida uluk ha'u hatete – apesar de ha'u aprende husi tempo indonésia nia tempo maibé de vez em quando sira minimiza ita – hanesan ne'e: «*Ai janganlah, orang Timor itu tidak mampu*». Ida-ne'e ita labele rona tanba, depois de ukun rasik an ne'e ema hotu-hotu bele dudu para sira-ne'e bele *mampu*, para empresário timoroan barak bele mosu iha-ne'e, ita labele hein ba grupo ida de'it. E depois, iha projetos barak tebetebes. Sr. Vice, favor ida, companhia balu nia na'in ne'e companhia ida na'in ne'e iha quase sanulu resin iha ema ida nia naran ho família tomak ne'e, ha'u hanoin, ladún normal. Ami tun bá terreno, Comissão E bá, ohin ha'u-nia colega sira la levanta mas la iha buat ida, ha'u levanta, ne'ebe, se bele, haree ba fó mós oportunidade ba sira seluk.

Ida-ne'e de'it mak ha'u hakarak hato'o.

Obrigado.

Sr.^a **Presidente**: — Muito obrigada.

Tuirmai, Sr.^a Deputada Carminda Carlota.

Antes de intervém, iha na'in-tolu husu ponto de ordem. Mas, bele permite hela na'in-tolu para halo intervenção. Último pedido ba ida intervenção da declaração política o Sr. José, e depois ha'u sei fó ba Sr. Deputado Antoninho Bianco, Deputado Luís. Pode ser?

Ne'ebe ha'u fó uluk ba Deputada Carminda Carlota.

Halo favor.

Sr.^a **Carminda Carlota** (CNRT): — Ha'u-nia bom dia ba Presidente, componente da Mesa, distintos e distintas Deputados, Excelência Vice-Ministro dos Assuntos Parlamentares, mídia, povo do ben mak ha'u hadomi e ha'u respeita.

Ha'u atu cita uitoan problema vídeo ida-ne'ebé *viral* iha *Facebook*, tula avô moras ida husi Sibuni atu mai Bobonaro. Ne'e impacto husi estrada e mota halo ambulância liu la di'ak, então ita-nia povo hulan avô ne'e hodi ambulância bele simu iha mota sorin. Ne'e mak, Excelência, iha semana kotuk ha'u foti ona kona-ba ponte Sibuni ou estrada Molop tanba dificulta tebes povo sira husi Sibuni ho Molop atu mai iha posto Bobonaro. E ohin, antes ita-nia Senhor Deputado ida ko'alia, katak hodi Maromak nia lian, ha'u ko'alia buat ne'ebé loos e ha'u la bossok. Na realidade ida-ne'e mak dehan bosok loloos. Antes atu ko'alia, ita tem que haree e husu lai informação ida que loos. Ha'u iha vídeo completo iha-ne'e. Avô ne'e leva husi Sibuni atu mai Molop. Tanba estrada aat e mota boot, então ambulância husi Bobonaro tun ba pára de'it iha mota-ninin e sira leba avô ne'e liu mota hodi mai iha Bobonaro. Então, ha'u atu dehan de'it, ha'u husu Deputado sira, antes atu ko'alia, haree lai informação, husu lai informação ida loloos mak bele mai foti iha Parlamento ne'e, selae povo iha base ne'ebá haree ita hamnasa tanba ita bossok mak barak. Ha'u iha vídeo completo iha-ne'e. Se Deputado la fiar, ha'u bele fó ba Deputado haree vídeo ne'e, sira leva avô ne'e husi mota sorin mai iha mota sorin tula iha ambulância. Então, sira balu ne'ebé la gosta Governo ida-ne'e, *edit* vídeo ne'e, la hasai ambulância ne'e maibé hasai de'it mak ida leba iha mota laran ne'e mai, ne'ebe, Deputado ida ohin ko'alia dehan katak diretor saúde la haruka ambulância tun bá tula avô ka paciente ne'e, ne'e bosok! Ha'u iha vídeo completo!

E, iha-ne'e mós ha'u atu ko'alia uitoan kona-ba segunda e terça ita la ko'alia buat seluk, ita ko'alia de'it mak evicção.

Colega sira, lalika tau óculo metan hodi hateke situação sira Díli laran agora ne'e! Ita-Boot sira nota buat ida ka lae? Tinan-tinan, quando udan horas ida de'it ita haree inundação iha Díli laran ne'e

tama ema nia uma, tama iha fatin-fatin, ita haree dala ruma estrada sira-ne'e bee nakonu. Maibé, agora dadauk, ho evicção ida-ne'e, ita haree, maski udan husi dadeer-saan, husi kalan to'o fali dadeer-saan ita la haree ema tau iha *Facebook* dehan inundaçāo iha fatin-fatin, la iha, ne'e tanba parte positiva ida husi evicção ne'e.

Ikusliu, ha'u-nia parabéns ba povo ne'ebé colabora di'ak tebes ho Governo ida-ne'e hodi halo desenvolvimento ba ita-nia Rain, tanba di'ak la'ós ba Governo ida-ne'e maibé ba ita-nia povo doben tomak e ba ita-nia bei-oan aban bainrua nian.

Obrigada, Presidente.

Sr.^a **Presidente**: — Tuirmai, Sr. Deputado António Calau.

Sr. **António Moniz Calau** (FRETILIN): — Di'ak, obrigado ba oportunidade.

Respeito ba Sr.^a Presidente Parlamento Nacional, composição da Mesa, Sr. Vice-Ministro, colega distinto, distinta Deputado, sira, povo Maubere ne'ebé sintoniza hela Plenária ida-ne'e, mídia, bom dia ba ita hotu, saudações revolucionárias!...

Sr. **Deputado sira husi Bancada FRETILIN**: — Sempre revolucionárias!

Sr. **António Moniz Calau** (FRETILIN): — ... Dahuluk, hakarak atu secunda no apoia, fó apreciação ba declaração ami-nia Bancada FRETILIN nian ne'ebé ohin loron levanta kona-ba problema evicção iha Município Díli, em geral iha Timor laran tomak.

Ha'u mós hakarak foti nafatin problema evicção. Nu'udar cidadão Rain ida-ne'e nian, apoia totalmente ba hanoin no iniciativa hodi halo desenvolvimento iha nação democrático ida-ne'e. Maibé, ação ne'ebé Secretário de Estado da Toponímia halo ne'e sala. Tanbasá? Nação ne'e harii ho história moruk ida, no povo sira-ne'ebé afetado hela husi evicção ne'e contribui mós iha história naruk ida-ne'e. Sira sai vítima ba harii Nação ida-ne'e no ohin sira sai vítima atu halo desenvolvimento ba nia Rain rasik.

Sr. Vice-Ministro, ema hotu apoia no hakarak Nação ida-ne'e tem que iha desenvolvimento ne'ebé di'ak, maibé dala uluk tem que cria condições ba cidadão sira ho digno, hanesan Sr. Xanana, iha momento ne'ebá e atual hanesan Sr. Primeiro-Ministro IX Governo nian hatete, «Hasai povo ki'ik kiak sira-ne'e atu bá tau iha ne'ebé? Estado saida mak hanesan ida-ne'e?». Ha'u observa, IX Governo hasai ita-nia povo sira husi sira-nia hela-fatin ho condição ida-ne'ebé la di'ak, ne'e risco aat liután. Pelo menos harii condição no fó tempo, labele ho promessa sira-ne'ebé halo comunidade sira hein hela promessa sira-ne'e, maibé la acontece, de repente aviso verbal de'it hodi sobu sira-nia hela-fatin. La

preparado, sira la hatene atu ba loos ne'ebé. Salva ema nia vida ita hotu apoia. Iha tempo udan hanesan ne'e mak hasai sira la'ós condição, la'ós atu salva, maibé atu oho, oho husi mental, trauma, oho husi tanis no halerik tutur liman halai iha udan laran. Ami husu ba IX Governo atu identifica uluk wainhira ita atu hasai ita-nia cidadão sira husi sira-nia hela-fatin.

Sira mai iha Díli ne'e atu halo saida e sira atu halo serbisu saida. Ami fó-hanoin filafali ba Secretário de Estado da Toponímia e Organização Urbana, ne'ebé sempre usa linguagem ida dehan hanesan ne'e: «*Tidak mau tahu*. Ó atu sai bá hela iha-ne'ebé la'ós ha'u-nia problema, *yang penting* ó sai husi fatin ida-ne'e, para halo desenvolvimento», ne'e triste tebes!

Be ida ita atu hasai ne'e sé? Ida ita atu hasai ne'e ita-nia povo ka la'ós? Pergunta ne'e ba ita hotu.

Liga ba evicção ne'ebé halo iha *Pasar Senggol*, ami dehan katak IX Governo plano la iha, tanba iha tempo ne'ebá halo evicção ne'e hodi harii jardim, de repente, kalan toba filafali mehi dehan katak jardim ne'e la di'ak, ita halo fali estrada. Então, ida-ne'e mak ita justifica katak plano ne'e toba mai mehi, aban ita halo. Ida-ne'e mak ami dehan plano la iha.

Ha'u hanoin, ida-ne'e mak ha'u-nia intervenção ba dadeer ida-ne'e.

Obrigado wa'in, Presidente.

Sr.^a **Presidente**: — Ikusliu ba intervenção, Sr. Deputado Saul Salvador.

Sr. **Saul Salvador H. J. Amaral** (CNRT): — Obrigado ba tempo.

Excelência Sr.^a Presidente Parlamento Nacional e Mesa, Excelência Vice-Ministro dos Assuntos Parlamentares, distintos Deputados no Deputadas, mídia e amado povo de Timor-Leste, declaração política ne'ebé fó-sai husi bancada oposição, ha'u hanoin, ne'e hanesan matéria seluk la iha ona, maibé mai ho emoção no la razoável.

Povo coopera, povo compreende ona, povo hakarak cidade organizado, povo hahú iha consciência saida mak espaço público. Evicção ne'ebé Governo halo, cumpre de'it lei, la viola direito ema nian maibé atu educa ita-nia povo no atu salva ita-nia povo husi desastre no compreende espaço público ne'ebé ema hotu nia direito atu hetan aceso. La'ós ema ida-rua ba ocupa tiha, depois dificulta ema barak nia movimento.

Sobre base legal, ita iha Lei n.º 6/2017, de 19 de abril, Base do Ordenamento do Território. Ita mós iha Decreto-Lei n.º 9/2022, de 24 de fevereiro, Regime Jurídico da Edificação e Urbanização. Ita mós iha Diploma do Governo n.º 15, no, foin lailais ita discute ona, iha generalidade, kona-ba lei urbanística. Quando lei ne'e aprova mak ita sei organiza di'ak liután ita-nia cidade.

Governo halo evicção sempre mai ho sentimento humano, liuhusi halo dialogo, fó notificação, transporta ba fatin origem no fó indemnização. Resolve mós problema social no economia ba sira,

tanba Governo serbisu em equipa. Objetivo husi evicção ne'e atu organiza cidade tanba tama ona desordem pública, tanba ne'e, hakarak ka lakohi ita tem que hadi'a. Ita sei hetan resultado iha tempo tuir mai. Agora ita bele questiona, maibé ita sei admira ita-nia cidade iha futuro, geração tuirmai sei haksolok. La'ós hanesan VIII Governo, ne'ebé halo evicção iha Fulolo sem plano. Iha-ne'ebá la halo indemnização ba cidadão sira até à data maibé ocupa de'it ho força. Ne'ebe ita lalika hatudu liman ba malu.

Iha Becora, Kuluhun, Bebonuk ho tasi-ibun sira, cidadão sira ho consciência sobu rasik sira-nia uma, ne'e hatudu katak cidadão sira hakarak duni cidade organizado e sira hakarak cidade moos. Lei ordenamento ne'e la'ós ampla hanesan colega Deputado balu dehan, tanba Lei Urbanística hahú ita discute tiha ona, processo discussão la'o hela, tanba ne'e, ho lei ida-ne'e ita sei organiza di'ak liután.

Ha'u hanoin, ida-ne'e mak ha'u bele hato'o.

Obrigado, Sr.^a Presidente.

Sr.^a **Presidente**: — Agora ha'u tama ponto de ordem, iha cinco, ha'u espera katak ida-ne'e de'it.

Sr. Deputado José, ha'u bele confirma ho Ita-Boot, ainda tem cinco minutos para a declaração política, sua última intervenção.

Prefere ne'e ou prefere ponto de ordem um minuto?

Sr. **José da Cruz** (FRETILIN): — Ha'u usa direito ba ponto de ordem, cinco minutos ha'u fó ba Camarada Antoninho Bianco.

Sr.^a **Presidente**: — Está bem, ha'u tau ketak.

Sr. Deputado António Bianco mak última intervenção para declaração política. Então, eu deixo ficar o Senhor é que fala...

Sr. Deputado Antoninho Bianco dehan katak la'ós nia mak sei halo intervenção, maibé Deputado seluk.

... espera, estou a confirmar, só para ha'u bele fó.

Espera, se ponto de ordem, Ita-Boot seis minutos, depois Sr. Deputado...

Sr. Deputado Antoninho Bianco dehan katak troca tiha ona.

... oh troca fali, mas não tá aqui registado, ha'u atu bolu sé.

Então, ha'u fó ponto de ordem, cada ponto de ordem é um minuto, ha'u fó-hatene kedas.

Sr. Deputado José da Cruz, halo favor.

Sr. José da Cruz (FRETILIN): — Obrigado, Presidente.

Ohin balu ko'alia dehan katak «mai atu usa antena», ha'u dehan, fatin ida-ne'e fatin antena duni ba público, ba povo nia interesse. Saida mak ohin ko'alia, ne'e representa povo nia aspiração.

Povo hatete, depois de evicção até agora seidauk hetan indemnização ka compensação, ida-ne'e maka sira ko'alia, la'ós mai atu aproveita antena. Antena ne'e vale duni ba sira-nia lian, ba sira-nia interesse, ba sira-nia hakarak.

Comunidade sira vítima husi despejo iha Bebonuk até agora la hetan indemnização. Ema nia rai 40 m ho muro sobu tiha hotu até agora la iha indemnização. E indemnização ne'ebé la justo. Rai ho 40 m, muro 40 m, depois selu la ho balanço, seidauk selu até agora, ema hein hela. Ne'e caso....

Sr.^a Presidente desliga Deputado ne'e nia microfone tanba tempo hotu ona.

Sr.^a Presidente: — Muito obrigada

Tuirmai, Sr. Deputado Antoninho Bianco.

Sr. Antoninho Bianco (FRETILIN): — Obrigado.

Ha'u hanoin, ha'u hakarak hatete, povo nia nonook ne'e iha sentido, tanba ta'uk ou tanba ditadura mosu ona. Maluk sira, imi la hatene katak povo nonook iha sentido ida iha-ne'e, povo ne'e ta'uk no mós tanba ditadura mosu. Rai ida-ne'e, se FRETILIN la ko'alia atu defende povo, ha'u hanoin, imi-nia ouh ouh ne'e mós imi hela iha fatin ka lae.

Ohin loron imi gaba an ho Xanana. Se Xanana la'ós Primeiro-Ministro karik, imi ouh ouh, ha'u hanoin, la iha karik. Ha'u fiar katak Rai ne'e hateke ita. Povo ne'e haree de'it figura ne'e mak hanesan ne'e mas ditadura mosu ona iha nia. Ne'e mak imi temi comando, comando ne'e, tuir loos agora ne'e la'ós comando. Se Primeiro-Ministro, Primeiro-Ministro! La'ós usa comando, tanba ne'e maluk sira, ação ...

Sr.^a Presidente desliga Sr. Deputado ne'e nia microfone.

Sr.^a Presidente: — Tuirmai, ha'u fó tempo ba Sr. Deputado Luís Roberto, um minuto.

Sr. Luís Roberto da Silva (KHUNTO): — Obrigado, Presidente.

Ba ha'u-nia um minuto ne'e ha'u hakarak hatete ba maluk Deputado no Deputada sira-ne'ebé hatete beibeik katak Governo anterior la halo buat ida, balu dehan tan katak estrada rohan metro ida mós la iha, ida-ne'e ha'u la aceita. Ne'e significa Ita-Boot sira-nia fuan kala dukur hela karik.

Ha'u hakarak hatete de'it katak ita ko'alia kona-ba boa governação, ha'u dirige ba Sua Excelência Primeiro-Ministro atu gere didi'ak IX Governo, tanba ko'alia kona-ba questão evicção precisa duni cria condição para povo ne'e labele halerik tan. Ida-ne'e mak Bancada KHUNTO exige, la'ós laran moras, lae! Boa governação sé mak lakohi? Precisa hadi'a gestão ida-ne'e.

Obrigado.

Sr.^a **Presidente**: — Tuirmai, Sr.^a Deputada Cedelízia Faria dos Santos.

Sr.^a **Cedelízia Faria dos Santos** (CNRT): — Muito obrigada, Presidente.

Ha'u ohin foti kedas ponto de ordem antecipadamente tanba ha'u hatene parte sorin ne'ebá sei hatán ha'u.

Ha'u hakarak dehan, ne'e mak realidade duni, tanba ita dehan atu halo buat ida ne'e halo ida-ne'ebé bá. Dehan halo desenvolvimento ne'e estrada metro hira ne'e hatudu mai! Ami hatene mak estrada pedasuk ida iha embaixada Japão nia oin ne'e, ida-ne'e mak ita halo. Agora, ita dehan fali agora mak ditadura, la hadomi fali povo, Ita-Boot sira bá hakoi no soe de'it ita-nia população iha Metinaro ho *bulldozers* boot – la hatene buat ne'e naran *bulldozers* mak ne'e ka saida mak ne'e – foti bá riba hela população iha-ne'ebá, ida-ne'e mak Ita-Boot sira ditador. Ita-Boot ba dehan fali ami-nia Maun Boot Xanana, ami tem que *bangga* duni, ne'e ami-nia Presidente Partido. Ami-nia presidente partido tiha, Ita-Boot sira dehan «imi *bangga* fali ho Maun Xanana», claro, nia mós líder nacional. Ita lalika han malu kona-ba Maun Boot Xanana.

Partido CNRT, ami iha missão, ami iha visão, ami iha ami-nia plano estratégico curto prazo, longo prazo...

Sr.^a *Presidente desliga Deputada ne'e nia microfone.*

Sr.^a **Presidente**: — De seguida, Sr.^a Deputada Maria Gorumali.

Sr.^a **Maria Gorumali Barreto** (CNRT): — Obrigada, Presidente.

Bom dia ba hotu-hotu.

Sr.^a Presidente, iha oportunidade ida-ne'e ha'u hakarak atu dehan katak tinan ida-ne'e ita tem que haree, depois de fim do ano de 2024 iha Timor no mós nação vizinho udan maka'as, udan mai ho

volume ida-ne'ebé maka'as resulta mota boot, estrada kotu e rai dodok, tanba ne'e mak ho condição hirak-ne'e hotu, paciente sira-ne'ebé transfere mai husi posto saúde, husi centro saúde labele refere mai. E, iha fatin balu ne'ebé paciente sira la bele transfere ho ambulância tanba condição mota ho udan boot.

Ha'u foti exemplo, hanesan ohin Deputado sira balu questiona kona-ba Sibuni, Sibuni nia condição ne'e iha tempo udan hanesan ne'e mota ida-ne'ebá ne'e mota ida-ne'ebé kle'an e ambulância, carreta saida de'it la bele liu, tanba ne'e mak acontece hanesan saida mak ohin Deputado ko'alia, ne'ebé la'ós dehan ambulância la bá ne'ebá, lae!...

Sr.^a Presidente desliga Deputado ne'e nia microfone.

Sr.^a **Presidente** : — Ponto de ordem ikusliu, Sr. Deputado Natalino dos Santos.

Sr. **Natalino dos Santos Nascimento** (CNRT): — Obrigado ba tempo.

Ha'u hakarak hatete, hanesan uluk ema dehan, «Nicolau mate ona, imi lalika hanoin ukun rasik an!», ohin ha'u rona tan liafuan ida dehan, «Quando Xanana la iha, imi CNRT ne'e bá ne'ebé?» Uluk ema *pernah* hatete hanesan ne'e ba ha'u, mas ha'u iha esperança dehan «Nicolau la iha, sei mosu Nicolau foun, e mosu duni Xanana». CNRT mós hanesan ne'e, Xanana nia isin mak la iha, ninia espírito, ninia missão, visão, ami sei continua nafatin lori povo ida-ne'e ba to'o libertação total.

Ha'u hakarak desafia colega sira iha-ne'e, hatudu katak CNRT ne'e sa'e gradualmente, dezoito sa'e to'o 31 cadeira, hatudu katak CNRT la'o duni, la'ós tun fali husi 55, tun fali to'o agora. Ida-ne'e ami mós questiona hela, karik ita atu halo comparação. Ne'ebe, colega sira, mai ita discute sasán ba desenvolvimento, ita ko'alia sasán ne'ebé ba bem-estar do povo. Agora, ita mai ko'alia fali halo comparação, comando ne'e *memang* comando duni...

Sr.^a Presidente desliga Deputado ne'e nia microfone.

Sr.^a **Presidente**: — Ha'u husu desculpa, mas um minuto hotu ona.

Permite-me, Sr. Deputados, atu fó última intervenção ba declaração política da Bancada da FRETILIN.

Sr. **Aniceto Longuinhos Guterres Lopes** (FRETILIN): — Obrigado, Sr.^a Presidente.

Rona liafuan ida evicção ba desenvolvimento, iha Indonésia nia tempo ha'u rona tiha ona, «*penggunaan demi pembangunan*». Agora, ita duni-sai tiha Indonésia, ita kaer nafatin lição aat ka conceito at Indonésia nian ne'e, afinal de contas ita nafatin de'it, ita la muda ida.

Indonésia nia tempo ema dehan *penggusuran* ba *pembangunan* ne'e tanba poder ne'e *kong kali kong* ho ema rico sira, depois duni-sai ema kiak sira. Ida-ne'e mak agora acontece daudauk iha Timor, tanba conceito ida-ne'e conceito ne'ebé hatudu poder nia incapacidade atu fó solução ba problema, hatudu poder nia carácter ida ditadura. Ida-ne'e mak agora acontece. Ba interesse ema rico nian, ema kiak sira duni-sai husi cidade. Agora sira be sira duni-sai ne'e sai saida? Afinal imi-nia interesse ne'e ba ema rico de'it.

Srs. Deputados, hasai ema ka duni ema sai husi ninia uma ka hela-fatin tem que fó condição. Ema sira-ne'e maihusi município, mai iha Díli hodi buka moris. Tanba município la iha condição, tanba Estado ka Governo sira-ne'ebé ukun ne'e falha halo desenvolvimento, tem que fó condição ba ema sira atu moris di'ak liu, moris di'ak liu do que fatin ne'ebé sira hela antes, fatin ne'ebé Governo hasai. Fó condição atu moris ho digno hanesan ema rico sira, ne'e mak dehan conceito loloos ida ho positivamente ita dehan evicção ba desenvolvimento ne'e mak ida-ne'e. Katak, ita, quando halo evicção ba desenvolvimento ne'e, depois de evicção ne'e ema nia moris di'ak liu do que antes, ne'e mak dehan desenvolvimento, porque la iha desenvolvimento ida-ne'ebé hamosu fali vítima. Ida-ne'e mak dehan hatudu ita-nia incapacidade atu ukun, atu fó solução ba problema, porque la iha desenvolvimento. Loloos ne'e desenvolvimento ne'e atu halo ema di'ak, la'ós atu halo ema aat, la'ós halo ema sai vítima. To'o evicção hotu, depois ema nia vida sai saida?

Evicção ba desenvolvimento ne'ebé loloos ne'e biar ema hetan evicção, ema hotu-hotu, kiak ka rico, goza hanesan. Se la'ós ida hanesan ne'e, desenvolvimento ne'e discriminação, discrimina ema, ema kiak ho ema rico. Então, Ita-Boot sira ukun ema rico de'it ka?

Obrigado.

Sr.^a **Presidente:** — Muito obrigada.

Tuirmai, ha'u fó tempo kedas ba Sr. Vice-Ministro dos Assuntos Parlamentares.

Foram 17 Deputados, mas, se la bele responde hotu, balu por escrito de'it.

Sr. Vice-Ministro, ha'u fó vinte minutos ba Ita-Boot.

Halo favor.

Sr. **Vice-Ministro dos Assuntos Parlamentares** (Adérito Hugo da Costa): — Muito obrigado, Sr.^a Presidente Parlamento Nacional e membros da Mesa, ba distinto Deputado e Deputada sira hotu, bom dia.

Antes fó resposta ba pergunta sira-ne'ebé hato'o, ha'u atualiza de'it progresso balu em relação ho evicção.

Ha'u atu fó resposta ba declaração política Bancada FRETILIN nian sobre evicção.

Sr. Deputado sira hotu, facto husi evicção, ita haree semana rua liubá udan boot ho intensidade boot tebes iha Díli la iha inundação, ponto importante husi gesto governação ida-ne'e nian ba ordena cidade Díli.

Ponto segundo, Senhora na'in ba restaurante Cosette fó educação cívica ida ba ita hotu sobre regras. Quando Governo hatete katak ninia restaurante ne'e ultrapassa tiha rai público nian, Estado nian, 3 m, nia la ko'alia barak. Nia hakat bá tribunal husu justiça, «Loos ka lae ha'u tem que hakiduk 3 m?».

Tribunal decide dehan: «Loos, Ita-Boot sala» e nia nonook loos, ida ohin declaração política dehan katak restaurante Cosette ne'e. Restaurante ida-ne'e iha ninia rai rasik, maibé nia hakat liutiha 3 m rai público nian. Bá notifica, husu nia atu sobu, nia koko atu desafia Governo, sério ka lae, e nia lori ba tribunal, nia la hakilar iha estrada laran. Matenek tebetebes Senhora ne'e ho nia família, positivo tebetebes ba ita, liuliu ita sira halo política ne'e. Agora nia sobu rasik 3 m ne'e, nia hakiduk 3 m, ita atu foti conclusão saida husi ida-ne'e, husi ato Senhora ne'e nian? Hanesan cidadão, nia cumpre, hanesan cidadão nia cumpre tanba rai ida nia usa 3 m ne'e la'ós ninian.

Hanesan mós sira ne'ebé iha Becora, ohin declaração política dehan mós, sira sobu rasik, voluntario, depois de Governo, ministério relevante, bá hato'o katak ida-ne'e atu usa ba interesse público. Sira ne'ebé rai rasik, sim, processo sei halo cálculo para depois halo indemnização de acordo ho lei ne'ebé iha. Factos! Sira la hakilar mós, sira ne'ebé sobu ne'e mós la hakilar, la buka popularidade barata atu desafia decisão Estado nian, Governo halo.

Próprio jovem sira ne'ebé vocal tebetebes iha área ne'ebá mós coopera. Ita assiste iha mídia, Lalika bosok! Lalika ita finge hateke sira-ne'e, jovem sira, jovem resistência. E, ita valoriza população sira-nia vontade hanesan cidadão ne'ebé iha responsabilidade, considera sasán ne'e la'ós ninian, nia muda voluntariamente. Ida-ne'e sala? Ida-ne'e ita labele valoriza? Karik ita sala iha fatin Uma Lulik ida-ne'e, karik ita mós sala, ita la educa, la ajuda atu educa, fó mensagem positiva ba vontade cidadão nian atu cumpre regra Estado hanesan cidadão, la'ós contrário. Ne'e mós vontade atu salva Estado, salva Estado hatudu husi povo nia hahalok. Povo simples ida hatudu ninia gesto salva Estado ne'e ho ninia vontade, cumpre regra, la'ós contrário. Ba sira ne'ebé la'ós povo baibain, gosta halo discurso buka popularidade sem prática iha terreno durante ita-nia serbisu ita-nia mandato ita halo netik buat ruma ba sira.

Senhor Deputado sira, IX Governo sei la hakiduk ba ordenação cidade, ordenamento cidade hotu-hotu. La'ós de'it iha Díli, semana kotuk, iha sábado, ha'u bá Baucau, ha'u admira tebetebes ho comunidade Baucau, cidade boot ho população n.º 3 iha território, ne'ebé antes ne'e desorganizado total, quase total, e agora organizado. Parabéns ba povo Baucau! Mós tem que fó parabéns ba sira-nia vontade hanesan cidadão ne'ebé iha responsabilidade atu contribui ba desenvolvimento país nian. Furak tebetebes haree gesto povo Baucau nian, inclui sira iha Díli.

Senhor Deputado sira, ha'u confirma último, ohin dehan seidauk selu parte Manleu nian, selu ona! Indemnização ida dehan la justo ne'e la justo tanba cálculo ida baseia ba rai mota-ibun ne'e la'ós ba hela. Ne'e la'ós rai privado atu cálculo geral ida ba termo ida atu usa ba ne'ebá. Uma sem iha certificação, la'ós na'in, rai mota-ibun, que proibido atu hela, mas sei fó, sei halo cálculo montante ida para bele fó ba sira, iha netik condição do que bá duni-sai de'it. Mas população sira-ne'e la iha ida lori processo ne'e bá to'o tribunal atu buka justiça, tanba sira cumpre, sira hatene katak, «Lae, sasán ne'e loos duni».

Ka ita atu husu sira halo impedimento ho maneiras oinsá, husi Bancada FRETILIN? Karik Bancada seluk bele fó mós exemplo ruma mai ami? Para bele haree modelo gesto saida atu compensa população sira hela iha rai ne'ebé la'ós atu hela. Sé mak bele hatete ba ami, Governo, katak hela iha Fomento II mota-ibun ne'e desde 99? Lae! Número ne'e foin aumenta iha último três quatro anos tanba ita la coordena, ita la ordena, ita la alerta população sira. Se agora ita alerta, sira cumpre loos. Tun ba Bebonuk ne'e la iha tan ema ida ba hamriik, Chefe suco mesamesak de'it, sira hotu nadodon ba chefe suco katak «sim, ami voluntariamente sobu». Hanesan mós iha município seluseluk. E ne'e sei continua, Senhor Deputado sira. Durante cidade seidauk ordena ho didi'ak, Governo iha responsabilidade moral e política perante povo, e aproveita educa mós povo, katak «cumpre bá! sasán ne'ebé ita-nian, ita-nian, sasán ne'e la'ós ita-nian, Estado nian, ajuda Estado atu resolve». Ne'e mak responsabilidade moral e política. Karik ita sira político ne'e mós bele halo, la'ós halo contrário.

Senhor Deputado sira, ba uma 32 iha parte Bebonuk nian, horas ne'e Ministério das Finanças prepara ona atu selu iha semana ne'e, Bebonuk 32 casas. Ita dehan casas, mas, ne'e kios sira, *bahasa* indonésia karik dehan *gubuk* sira, selu, compensação tuir cálculo Governo nian tem que fó. La'ós indemnização ba rai-na'in ou uma rasik, ou uma di'ak. Uma provisório sira ne'e mós selu tanba sira hela, e selu. Mobilização, sira sai mós Governo contribui. La hatene, karik movimento sira agora halo ne'e karik atu husu ba população sira-ne'e ba filafali bá hela. Bele halo, atu salva nação karik bele.

Ai-Tarak Laran selu hotu ona. Estrada Estado usa ona, ita hotu halai kona ba nabilan loos, selu hotu ona. Selu hotu ona, Ai-Tarak Laran, resultado ita hotu haree rasik.

Senhor Deputado sira hotu, Governo sei la pára ba hahalok ida-ne'e. La'ós ditadura, la'ós ditadura! La'ós ditadura, mas hatudu seriedade dehan ukun, ukun duni. La'ós ukun, ita halo tiha socialização dehan katak «labele hela iha-ne'e!», depois atu executa la bele. Ne'e ita bosok! Até socialização ba comunidade iha Tasi-Tolu, inteira hotu ona atu muda, mas tanba questão seluk, no fim la executa, mak husik hela to'o agora nafatin.

Situação hanesan mós acontece iha passado ba sira seluseluk ne'e, notifica hela, notifica hela, mas labele executa. Ha'u la hatene tanba saida, tanba la iha responsabilidade política husi sira ne'ebé ukun. Depois, quando ema seluk executa atu ordena, ita dehan, «Ne'e sala!». Se hotu-hotu hakarak

comunga, hananu música hanesan, ita sei la ordena cidade. Governo ida-ne'e to'o halo decisão sira-ne'e mós ho coligação ida 37 Deputados iha Parlamento mak viabiliza ba Governo ida-ne'e e barani foti risco hodi halo. Sira seluk ne'ebé atu salva ne'e bele luta bá para bele maioria absoluta, bele halo decisão mesamesak iha governação sira tuirmai, la precisa halo gestão ba coligação hodi halo decisão ne'ebé brani, decisão ne'ebé atu dignifica Estado perante povo ba desenvolvimento País nian.

Ha'u horisehik iha Baucau, semana kotuk ha'u iha Suai, semana kotuk liu fali ha'u iha capital Maliana. Maliana mak sei susar loos tanba obra ida husik hela iha-ne'ebá, fó ba companhia ne'ebé la iha capacidade atu halo estrada. Lançamento ho festa boboot, maibé projeto la la'o to'o agora, povo Maliana sei terus hela nafatin – Maliana cidade – ba estrada.

Salva osan povo nian ba ponte Kasnafar husi nove e tal milhões de dólares ho três milhões de'it agora inaugura, povo usa ona, Estado utiliza ona. Salva osan povo nian, husi nove milhões tentativa atu halo ponte ida ho de'it três milhões, salva povo ne'e nia osan, dignifica Estado, salva Nação ne'e nia osan, povo nia osan.

Avaliação ba projeto estrada balu ho 5 km ho valor 20 milhões mós ita salva Estado, husi tentativa atu estraga osan povo nian. Auditoria, resultado atu mai ona fulan tolu, ohin sei rona resultado, ba acto seluseluk tan ne'ebé reflete ita ninia proclamação dehan ita mak salva povo ho Nação ne'e iha prática governação, iha tempo badak sei hetan resultado.

Salva povo ho Estado husi operacionalização avião ZEESM (Zona Especial de Economia Social de Mercado), salva propriedade Estado nian, uma iha Oe-Cusse ne'ebé usa osan Estado nian hodi halo construção sai ba na'in privado, salva e liuhosi tribunal dehan, «Lae! Sasán ne'e Estado nian». La'ós voluntário entrega, liuhosi tribunal mak tribunal pronuncia dehan sasán ne'e tem que fila tanba la'ós privado. Ne'e mak salva povo, salva Estado, salva Nação. Ne'e mak ita bele ko'alia mamar, fácil, dehan katak salva Estado ne'e iha prática, labele ko'alia de'it.

E espera movimento salva Nação nian tem que transforma ba prática, prática real perante povo nia matan laran lori haree. Lalika julga ho acto sira-ne'e, ho termo ne'ebé la'ós ona fatin atu introduz iha Timor ida ukun an ne'e. Ditadura dalan la iha! Ditadura labele moris ona iha Rai ida-ne'e desde restauração independência! Hatudu iha prática, Senhor Deputado sira hotu, e ha'u promete katak sei la mosu. E sé mak tenta atu hamosu, nia hasoru povo, povo terus-na'in. Povo ne'e luta ba bandeira ida agora hamriik ne'e. Ditadura sei la mosu, e sé mak hamosu ditadura, nia hasoru povo. Tanba povo ne'e matenek mak ohin loron la iha duni ditadura, tentativa oioin, mas lae, la iha dalan. Tentativa iha, mas povo matenek liu ita. E bandu, lulik ba termo ida-ne'e atu mosu. Tanba lulik ne'e mak comando FDTL (Forças de Defesa de Timor-Leste) tuur hakmatek, comando PNTL tuur hakmatek, sira profissional serbí Rain ida-ne'e.

Senhor Deputado sira hotu, Senhora Presidente Parlamento Nacional, ha'u fó resposta em nome IX Governo, em nome Chefe do Governo, Kay Rala Xanana Gusmão, ba nia naran sira ne'ebé ohin Senhor Deputado sira temi.

Ha'u responde em nome IX Governo, em nome Chefe do Governo, katak lalika mehi atu lori ditadura mai Rai ida-ne'e, satán governação ida-ne'e atu lori ditadura, lalika mehi! Ou, mehi karik husik ba agenda privada Ita-Boot sira-nian, lalika tula mai kbaas governação ida-ne'e nian, satán Maun Boot Kay Rala Xanana Gusmão nian. Paciência lori assiste, desenvolvimento sei mai ba povo, ba ita-nia Rain. Paciência lori hein governação ida-ne'e sei halo nafatin serbisu ba povo to'o nia mandato hotu. Balu temi daudauk ona mandato atu to'o rohan, bele mehi nafatin bá e ami halo serbisu nafatin ba povo ho Nação.

Muito obrigado, Sr.^a Presidente do Parlamento Nacional.

Sr.^a **Presidente:** — Muito obrigada, Sr. Vice-Ministro dos Assuntos Parlamentares.

Ohin, tanba Sr. Deputado Leandro dehan, «Sr.^a Presidente ahi mate beibeik, loos! Estado lakon receitas hanesan E.P.; segundo, prejudica clientes, inclui ha'u mós ho Ita-Boot; terceiro, implica serviços do Estado.

Ita hotu usar ar condicionado, imagina toda gente vai para a casa e la iha nem ema ida serbí povo. Conclusão saida? Bolu membro do Governo mai, ita debate. Ne'ebe, ha'u hanoin, matéria iha, mas ita tem que halo tuir regimento. Ya, dala ida tan. Ne'ebe, ho respeito tomak, distintos Deputados, estamos às 11h43, ha'u tem que husu autorização. Mas, ha'u hanoin, ita descansa uitoan, 15 minutos.

Iha Deputado ida koko intervém.

Não, Ita-Boot sira ko'alia, ha'u tuur rona de'it, ne'ebe ha'u mós husu ita bele descansa 15 minutos bá han ai-han uitoan, ita fila hikas mai para iha assunto rua tan ita atu debate.

Muito obrigada, e espero que voltem *on time*.

Pausa.

Sr.^a **Presidente:** — Srs. Deputados, boa tarde.

Ha'u precisa verifica quórum, tanba tuirmai ita precisa quórum deliberativo.

Muito obrigada.

Ita foin mak iha 26 Deputados. Liuliu, ha'u husu ho respeito ba bancada do Governo, que tem o dever de ter o quórum, ne'ebe halo favor. Deputado hotu-hotu iha salário hanesan, ne'ebe ita lalika sura malu. Mas ha'u exige liu ba bancada do Governo, todos têm deveres iguais.

Muito obrigada.

Ita la'o daudaun, depois do debate, ita hein iha quórum deliberativo mak ita bele vota, ne'ebe, dala ida tan, ho respeito, ha'u husu ba presidentes das bancadas para organizar os Deputados da sua própria bancada, liuliu bancada do Governo.

Ne'ebe, ha'u fó kedas tempo ba Sr.^a Secretária atu halo leitura ba assentimento à deslocação do Presidente da República à República de Socialista do Vietname em visita do Estado.

Halo favor.

Sr.^a **Secretária da Mesa** (Maria Teresa da Silva Gusmão): — Obrigada, Sr.^a Presidente.

«Presidente da República

Díli, 12 de fevereiro de 2025

Excelência,

Nos termos e para os efeitos previstos pelo n.º 1 do artigo 80.º, e da alínea *h*), do n.º 3, do artigo 95.º, da Constituição da República Democrática de Timor-leste, venho por este meio solicitar ao Parlamento Nacional consentimento prévio para uma deslocação oficial ao Vietname, em resposta ao convite de Sua Excelência Sr. Pham Minh Chinh, Primeiro-Ministro da República Socialista do Vietname, para participar no 2.º Fórum do Futuro da Associação das Nações do Sudeste Asiático (ASEAN), previsto entre 25 e 26 de fevereiro de 2025, em Hanói, no Vietname, sob o tema «Construir uma ASEAN unida, inclusiva e resiliente no contexto das transformações globais», a convite do Sr. Pham Minh Chinh, Primeiro-Ministro da República Socialista do Vietname.

Face ao exposto, venho, por este meio, informar nos termos e para os efeitos do disposto no n.º 1, do artigo 80.º, e da alínea *h*), do n.º 3, do artigo 95.º, ambos da Constituição da República Democrática de Timor-Leste, que estarei efetivamente ausente de Timor-Leste, entre 24 de fevereiro e 27 de fevereiro de 2025.

Ciente da aceitação de Sua Excelência Sr.^a Presidente do Parlamento Nacional, aproveito o ensejo para apresentar o protesto da minha elevada estima e consideração.

José Ramos Horta

Presidente».

Obrigada, Sr.^a Presidente.

Sr.^a **Presidente**: — MUITÍSSIMO obrigada, Sr.^a Secretária, pela leitura.

Ha'u loke ba distinto Deputado sira-nia apreciação. Se sei iha assunto ruma que hakarak ko'alia, halo favor atu regista.

Iha ona registo iha-ne'e, Sr. Deputado Florentino Ximenes.

Sr. Florentino Ximenes da Costa «Sinarai» (FRETILIN): — Obrigado, Presidente

Sua Excelência Presidente da República, dala ida tan, mai justifica ba Parlamento Nacional ninia completa viagem atu halo uma kala andar, 10 mehi tuir promessa ne'ebé iha campanha.

Tinan ba tinan ita nune'e hela de'it, nem lori *investor* ida mai. Iha 2024, ita hotu hatene, 33 visitas ne'e halo de'it nem halo buat ida, investimento ida la mai. Bá Vietnam ne'e kala atu ba aprende mós tanba Vietnam agora daudauk ne'e halo hela *pemecatan* ba nia *pejabat*, funcionário sira hamutuk *seratus ribu orang*, hamenus sira-nia ministério husi husi 30 kala ba 22 de'it, ne'e kala bá atu ba aprende ida-ne'e bele lori mai. Mas, ha'u fiar katak atu bá aprende de'it mak ida-ne'e, investimento ida sei zero, ida-ne'e mak Presidente sei bá trata.

Obrigado.

Sr.^a **Presidente:** — Já não tem mais, ne'ebe, distintos Deputados, Constituição mak fó dalan para Sua Excelência tem que husu autorização em visita de Estado. Ne'ebe, se lakohi fó nia sai bá li'ur, ita lalika aprova ninia orçamento. Dalan iha, tem caminho, para poder controlar um órgão e o outro. Mas, tanba Constituição haruka e ha'u mós iha dever atu lori mai distinto Deputado sira hotu atu halo aprovação ida-ne'e.

Distintos Deputados, se não tiver mais inscrições, que ninguém quer mais falar, ita prepara ba votação.

Preparem os cartões!

Distintos Deputados, quem vota a favor ba pedido assentimento de Sua Excelência Presidente ba Vietnam, a favor, contra ou abstenções.

Sr. Deputado ida foin tama iha sala plenária nian iha momento votação.

Entra, Sr. Deputado! Sim, entra! Eu ainda dou tempo para... *Lari!*

Sr.^a Presidente hamnasa bainhira husu Deputado ne'e atu halai.

Muito obrigado, distintos Deputados.

Hato'o ona ba votação no hetan aprovação ho voto a favor 31, contra 12 no abstenção 5.

Muitíssimo obrigada.

Ah, Sr.^a Secretária, ha'u husu para ita passa kedas ba aprovação do voto de pesar pelo falecimento do Sr. Harold Maria Meneses Moucho.

Sr.^a **Secretária da Mesa** (Maria Teresa da Silva Gusmão): — Obrigada, Sr.^a Presidente.

«Voto n.º 2/2025, de pesar pelo falecimento de Harold Maria Meneses Moucho

Faleceu, no dia 8 de fevereiro de 2025, no Hospital Nacional Guido Valadares, com 62 anos de idade, Harold Maria Meneses Moucho, cuja ação em prol da luta pela libertação nacional e da construção do Estado de Timor-Leste, uma vez restaurada a independência foi intensa e marcante.

Tendo passado a viver na Austrália com a família desde 1975, Harold Moucho organizou e participou em território australiano em diversas reuniões e atividades da FRETILIN, partido político histórico de cujo comité central se tornaria membro em 1987, tendo passado a exercer no seu âmbito uma militância ativa e intensa em prol da autodeterminação do povo de Timor-Leste e da luta pela independência nacional e angariando apoios de sindicatos, confissões religiosas, organizações de defesa dos direitos humanos e sociedade civil.

Regressado a Timor-Leste após o referendo de 1999, Harold Moucho, que se manteve fiel à sua filiação partidária, exerceu funções de assessoria política a Francisco Guterres “Lú Olo”, quer na sua qualidade de primeiro Presidente do Parlamento Nacional, quer enquanto ex-Presidente do Parlamento Nacional, quer ainda, mais recentemente, como Presidente da República, tendo com a sua ação contribuído grandemente para o desenvolvimento e consolidação dos dois órgãos de soberania por onde passou e para, em geral, o aprofundamento da democracia.

Pessoa amável e cordial, Harold Moucho granjeou amigos em todos quadrantes políticos e da sociedade, em cujos corações a sua memória perdurará.

Pela sua contribuição e dedicação durante uma vida inteira à luta pela libertação nacional e ao desenvolvimento do país, Harold Moucho foi condecorado com a Ordem de Timor-Leste, grau Insígnia, pelo decreto do Presidente da República n.º 32/2022, de 18 de maio.

Assim, o Parlamento Nacional, reunido em sessão plenária, expressa o seu profundo pesar pelo falecimento de Harold Maria Meneses Moucho, endereçando sentidas condolências à sua família, à FRETILIN e aos amigos enlutados.

Os Deputados proponentes,

Deputado Aniceto Longuinhas Guterres Lopes e Deputada Maria Angelina Lopes Sarmiento».

Obrigada, Sr.^a Presidente.

Sr.^a **Presidente**: — Distintos Deputados, ha'u loke ba apreciação.

Sr. Aniceto Longuinhos Guterres Lopes e Sr.^a Maria Angelina Lopes Sarmiento, talvez os proponentes atu pronuncia buat ruma?

Halo favor, Sr. Deputado.

Sr. **Aniceto Longuinhos Guterres Lopes** (FRETILIN): — Obrigado, Sr.^a Presidente.

Por razão de tempo, ohin ha'u assina nu'udar proponente ba voto ida-ne'e. Embora, ha'u haree katak buat balu seidauk completo, seidauk tama, informação balu ne'ebé pertinente tebtebtes atu inclui maibé la consegue inclui. Maibé, husu ba Plenário atu fó votos que favorável. Depois de votação, husu ba Mesa atu fó oportunidade mós ba Deputada Nurima Ribeiro Alkatiri atu completa informação ka dados balu ne'ebé importante atu inclui hotu iha voto ne'e.

Obrigado.

Sr.^a **Presidente**: — Sr.^a Angelina, ainda quer aumentar alguma coisa?

Não?

Okay, vou dar imediatamente, já está aqui registado, à Sr.^a Deputada Nurima Ribeiro Alkatiri.

Sr.^a **Nurima Ribeiro Alkatiri** (FRETILIN): — Obrigada, Presidente, bom dia.

Bom dia ba colega Deputado sira hotu, ba público tomak.

Voto de pesar ida-ne'e voto ne'ebé, mai ha'u pessoalmente, todan tebes, haree ba Harold Maria Menezes Moucho nu'udar ha'u-nia Camarada no mós nu'udar ha'u-nia Maun tanba ami sempre haree malu hanesan família ida.

Se Presidente permite, iha ninia biografia ne'ebé ha'u bele apresenta, inclui ninia participação iha história luta durante nia tempo iha Austrália no to'o ohin loron. Maibé, molok ida-ne'e, ha'u hakarak de'it iha correção balu iha voto de pesar.

Ninia naran loloos mak Harold Maria e Menezes Moucho, tem que ter «e», Harold Maria e Menezes Moucho, faleceu no dia 8 de fevereiro de 2025, na sua residência em Benonuk, Díli, não foi no hospital.

No segundo parágrafo, «... Tornou-se, em 1987, o Coordenador do Comité da FRETILIN em Sydney e eleito membro do Comité Central da FRETILIN em 2016 e reeleito em 2022».

Se a Presidente permite, posso ler a sua biografia.

Sr.^a **Presidente**: — Desculpa, Sr.^a Deputada. Eu agradecia se depois da votação, a sua contribuição à redação final antes de ita haruka ba publica, porque senão, torna muito longo porque o voto de pesar não é um CV.

Sr.^a **Nurima Ribeiro Alkatiri** (FRETILIN): — Está bem, pode ser.

«Em nome da FRETILIN, também em nome da Bancada, queremos apresentar à família de sangue, tanto de Turiscaí como de Bercoli, as nossas mais sentidas condolências.

Harold era uma pessoa que tinha amizade sem fronteiras políticas, dava-se com todas as pessoas que conhecia. Tinha amigos de todas as cores políticas e de todos os *backgrounds*. Isso foi demonstrado também durante o seu funeral com a presença de várias pessoas que sente a falta do nosso Camarada Harold Moucho.

E gostaria de pedir aos nossos Deputados todos para que aprovemos este voto de pesar a honrar o homem que ele foi, tanto como lutador pela nossa independência nacional, também como pessoa timorense afável que era.

Muito obrigada.

Sr.^a **Presidente**: — De seguida, o Sr. Deputado Antoninho Bianco.

Sr. **Antoninho Bianco** (FRETILIN): — Obrigado.

Primeiro, ha'u-nia agradecimento ba Maromak hodi haruka ami-nia Camarada naran Harold Maria e Menezes, ne'ebé ninia contribuição, bele dehan, desde sei jovem. Tempo iha início, ami, pelo menos iha 1999 no 2000, hamutuk, depois de Referendum, ninia contribuição ida que, ita bele dehan, barak. E, hanesan colega, iha política hanesan maun-alin. Exemplo ne'ebé nia halo, la'ós de'it hanesan político, maibé ema kaben-na'in ida que extraordinário. Ninia exemplo di'ak, memória di'ak, até princípio ne'ebé ha'u sente ha'u honra. Tanba ne'e, ha'u agradece ba Maromak e ha'u hein katak Maromak haraik ba nia ksolok iha Lalehan, e iha tempo bele harohan mós ba ita, ne'ebé horas ne'e sei la'o hela iha mundo provisório ne'e. Karik bele mós, la'ós hanesan nia maibé bele banati hahalok di'ak ruma ne'ebé nia husik. Ne'ebe, Ita-Boot husik ona mundo ne'e, ami fiar katak Ita-Nia klamar moris iha mundo seluk e ami hein ho esperança katak maluk sira-ne'ebé iha-ne'e bele fó votos, hodi fó homenagem ba ita-nia colega ne'ebé mai iha mundo depois fila ba mundo seluk, iha situação ne'ebé hakmatek.

Nune'e duni, ne'e hanesan expressão pessoal, hanesan camarada ne'ebé conhece nia, além de husi nia história processo luta nian no depois do Referendo, to'o Camarada husik nia iis.

Obrigado.

Descansa em Paz ba Camarada no mós sentidas condolências ba família tomak husi parte Ainaro, Turiscaí, no mos husi parte Baucau.

Obrigado barak.

Sr.^a **Presidente**: — De seguida, o Sr. Deputado David Dias Ximenes.

Sr. **David Dias Ximenes «Mandati» (FRETILIN)**: — Muito obrigado, Presidente.

Ha'u lakohi ko'alia barak kona-ba ita-nia Maluk, ita-nia Camarada, ita-nia Maun-Alin Harold Maria e Menezes Moucho. Nia só dehan de'it ida hanesan ne'e mai ha'u: «Diferença de pensamento la bele sai fali hanesan fronteira ba cria inimidade entre ita porque ho diferença ne'e mak ita sei aprende, ita evolui. Karik la iha diferença, ita sai labarik hotu, ne'ebe, diferença ne'e la bele sai fali inimidade, maibé loloos karik sai hanesan padrão ida para ita hotu-hotu hamutuk. Diferença ne'e iha nafatin para ita desenvolve, mas la bele sai fali inimidade». Ida-ne'e mak nia sempre ko'alia ho ha'u e ita testemunha duni, ita prova, katak nia la iha fronteira ho ema ida. Ida-ne'e mak ha'u hakarak husik, e, ao mesmo tempo, ha'u aprende ida-ne'e husi nia.

Muito obrigado, Presidente.

Sr.^a **Presidente**: — De seguida, o Sr. Deputado Presidente da Bancada do PD.

Halo favor.

Sr. **Armando dos Santos Lopes (PD)**: — Obrigado.

Excelência Presidente do Parlamento Nacional, composição da Mesa, colega distinto Deputado sira, mória no povo rona-na'in sira.

Representa Bancada Partido Democrático, acompanha memória ida-ne'ebé Saudoso Harold Maria e Menezes Moucho nia presença tomak iha mundo contribui ba luta hetan libertação nacional. Ohin loron ema barak goza e saudoso nia história baseia ba nia *biodata*, biografia ne'ebé iha, ami, husi Bancada Partido Democrático, hatu'o ba família no Bancada Partido FRETILIN, bele halo completo ninia biografia.

E, em nome Bancada Partido Democrático mós hatu'o ami-nia sentida condolência profunda ba saudoso e nune'e mós ami-nia sentimento solidariedade ba família ne'ebé lakon ema di'ak ida. Nune'e mós Nação, lakon ema di'ak ida-ne'ebé la hamutuk ona ho ita. Ita hatu'o ba Aman Maromak bele, liuhusi espírito naroman nian, leno nafatin ba nia no fó tulun ba nia família atubele moris ho hakmatek.

Mak ne'e de'it, obrigado barak.

Sr.^a **Presidente**: — Muito obrigada.

Tenho aqui já registado, Sr. Deputado Natalino dos Santos Nascimento.

Halo favor.

Sr. **Natalino dos Santos Nascimento** (CNRT): — Sim, obrigado ba tempo, Sr.^a Presidente.

Primeiro, hakarak lori Bancada CNRT nia naran hato'o sentida condolência ba família enlutada Camarada e Companheiro Harold, ho mós Partido FRETILIN. E, lori mós ha'u-nia naran pessoal, hakarak hato'o ha'u-nia sentida condolência ba Saudoso Harold.

Ha'u conhece nia hanesan ativista ativo ida iha luta da libertação iha Austrália. E, ha'u conhece nia bainhira, depois de 1999, iha primeira chegada ne'ebé nia maihusi Austrália, hasoru nia, hamutuk iha altura ne'ebá, iha Comité Central, ha'u haree katak ema ida-ne'ebé iha duni vontade. Ha'u sente orgulho, sira, iha 1975 bá li'ur, quando ukun an, decide filafali. Ida-ne'e mak halo ha'u sente orgulho, do que colega balu que uluk bá, mas sira, depois ukun an, la fila.

Ha'u hakarak hato'o ha'u-nia sentida condolência profunda ba família enlutada no mós Partido FRETILIN ne'ebé lakon ninia quadro ida.

Ida-ne'e de'it mak ha'u hakarak hato'o.

Adeus colega, Companheiro e Camarada Harold.

Sr.^a **Presidente**: — De seguida, ha'u fó tempo ba Sr.^a Deputada Maria Angelina Sarmento.

Sr.^a **Maria Angelina Lopes Sarmento** (PLP): — Muito obrigada, Sr.^a Presidente.

Boa tarde ba composição da Mesa, distinta no distinto Deputado sira hotu.

Hakarak aproveita halo intervenção em nome da Bancada, atu hato'o mós ami-nia profunda sentida condolência ba família enlutada, liuliu ba Partido FRETILIN, ne'ebé lakon ninia quadro di'ak ida, ema ne'ebé, ha'u hatene, iha consistência política desde início, hahú husi ninia idade jovem, ne'ebé contribui mós ba libertação da pátria, ne'ebé hanesan ema vocal ida hodi contribui ba movimento barak iha Austrália no ninia consistência política hafoin nia fila mai Timor-Leste depois da restauração da independência ou depois do referendo.

Ha'u convencido ho liafuan ida-ne'ebé nia rasik hasai mai ha'u bainhira ami, iha 1999, usa mós motto ida dehan, «*Who says women can not run East Timor?*». Iha loron ida nia hasai liafuan ida-ne'e mai ha'u, ha'u fiar katak feto bele lori mós Timor bá-oin», e, nia liafuan ida-ne'e sai mós hanesan *moto* ida-ne'ebé ami usa iha 1999, bainhira ami iha ligação di'ak ho estudante australiano sira. Liafuan ida-ne'e duni mak nia hasai fali mai ha'u e ha'u dehan ba nia katak *moto* ida-ne'e ami usa ona iha 1999, iha tempo difícil, no ohin loron ha'u rona fali husi Ita-Boot ho liafuan, «*Who says women can not run East Timor?*».

Ho nune'e, ha'u hakarak hato'o, em nome da Bancada PLP, ami-nia sentida profunda condolência ba família no mós ba Partido FRETILIN, no Camarada Presidente «Lú Olo», ema ne'ebé besik liu ho camarada Harold durante nia percurso iha política tomak, hahú husi fase início da independência to'o nia hakotu nia vida iha duni rai doben RDTL ida-ne'e.

Mak ne'e de'it ha'u-nia intervenção, Sr.^a Presidente.

Obrigada.

Sr.^a **Presidente**: — Ha'u atu confirma de'it ho Bancada do KHUNTO.

Faz favor, Senhor Deputado.

Sr. **António Verdial de Sousa** (KHUNTO): — Muito obrigado, Sr.^a Presidente.

Ba dahuluk, ha'u sente lakon tebetebes colega di'ak, camarada Harold. Ho nune'e mak, representa Bancada Kmanek Haburas Unidade Nacional Timoroan, ha'u atu hatete de'it, husu atu ita hotu reza ba Aman Maromak, atu nune'e haraik fatin kmanek ba saudoso Camarada Harold iha Aman Maromak nia kadunan santo.

Representa Bancada KHUNTO mós husu atu Camarada Harold husi «triunfante» reza mai ami ne'ebé halo hela política iha Rai Doben ida-ne'e no mós ita hirak ne'ebé halo hela peregrinação iha mundo ida-ne'e, nafatin ita reza ba malu, atu nune'e ita hotu hetan fatin ksolok – la'ós la iha rohan maibé rohan sempre iha – atu nune'e ita bele moris iha kmanek nia laran nafatin.

Obrigado, Presidente.

Sr.^a **Presidente**: — Distintos Deputados, como la iha tan registo, ita prepara ba vota. Ne'ebe, prepara cartões.

Quem vota a favor, contra ho abstenção?

Deputado sira hala'o votação ordinária.

Muito obrigada.

Hato'o ona ba votação no hetan ona aprovação ho voto a favor 52, contra 0 no abstenção 0.

Hodi nune'e, ita remata ita-nia serbisu. Voto de pesar ne'e passa ho maioria absoluta.

Muitíssimo obrigada. Ha'u-nia desejo, aban ita la iha sessão Plenária, ne'ebé tempo fó tomak ba distintos Deputados hodi conclui serbisu sira iha comissões para próxima semana ita bele iha sessões tuirmai.

Muitíssimo obrigada.

Bom trabalho, boa tarde, bom almoço na casa de cada um.

Horas hatudu tuku 12 liu minuto 46.